

ASO LULU, 18 IANUARI 2023

Na nofoia e le Fofoga Fetalai le Nofoa i le itula e 9:26 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taualumaga a le Fono Aoaofaitulafono.

E i ai le manatu o le a taoto ia taaseuga o le vaosa o tupu ma le matavai failelea nai salifaavale, aua o lea ua faalepa le fua o le pale ma le folau, o lea ua tatau le ai o lapega, ma ua gagana foi faaafualoma le soa o tautai o le peau ma le tai.

O sa ma faiga o le Maota nei, o paia lava e le toe aveva, e tumau e oo i le faavavau. Tatou te faafoi pea le viiga i le Atua ona o Lona alofa ma Lona agalelei, ua fai lea ma taialavaa i lo tatou ulufafo ma le ulufale, a o Lona foi mataisau e afua mai le mea e oso ae ai le la, seia oo i le mea e goto ai le la.

I le tulaga aloaia ou te faatalofa ma faatulima atu ai leni taeao fou i le toe tauaofia ai o le Palemene aua le faaauauina o le tatou galuega. I le afio o lau Afioga i le Sui Palemia ma le Kapeneta, e faapea foi afioga i Minisita Lagolago.

Afio lau Afioga i le Sui Taitai o le Itu Agai ma sui usufono mamalu uma o le Palemene, malo le soifua manuia.

I le faafofoga tapuai mai a Samoa i ona tulaga faalagia, e faatalofa atu lau Palemene i leni taeao fou.

Le tapuaiga a Ofisa Sili o Pulega o Matagaluega ma Faalapotopotoga Tumaoti a lo tatou Malo ua mafai ona tatou faatasi i leni taeao, malo le usu, faafetai mo le auaunaga faaauau e lagolagosua ai i le Malo ma le Palemene.

I leni aso ma le alofaiva o le tatou Maota, ia tafatafafuga e le Atua le faalelegafulu e matimati ai le tatou galuega.

Ia manuia le usugafono a lau Afioga i le Sui Palemia ma le Kapeneta, ia manuia foi le usugafono a itumalo uma e fia o le atunuu, manuia foi lau faafogafoga tapuai mai Samoa.

TUUIINA ATU O PEPA

Na tolaulauina e le Failautusi i le Fono Aoa le faasologa o Pepa e tusa ai ma T.T.49(2).

1. P.P.2022/2023 Nu.141, Lipoti Faaletausaga a le Matagaluega o Fesootaiga ma Faamatalaga Tekonolosi mo le Tausaga Faaletupe 2021/2022.

Ma le faaaloalo lau Afioga.

**TULAFONO TAU FAAOFI O LE FAATATAUINA O TUPE
FAAOPOPO (NU.1) 2022/2023 – felafolafoaiga faaauau i luga o le
faitauga faalua – Aso 2**

FOFOGA FETALAI: E tolopo felafolafoaiga i le afiafi ananafi o lo o saunoa le sui usufono mo Gagaifomauga 1. Ia, o le avanoa leni mo lau Afioga le sui usufono mamalu e faaauau ai lau saunoaga.

Tulai mai le sui usufono mamalu.

Tofa Hon FAIMALOTOA KIKA IEMAIMA STOWERS-AH KAU (Gagaifomauga 1): Faafetai atu i lau Afioga i le Fofoga Fetalai mo le avanoa o leni usugafono mai Salafai, le itumalo o Gagaifomauga 1. E toe faatalofa atu foi i leni taeao i le paia maualuga o le Maota, i lau Afioga i le Sui Palemia, le Vasega o Minisita o le Kapeneta, ia e faapena foi i Minisita Lagolago.

Ia, taliu mai i leni Itu i le matou Sui Taitai ma sui usufono mamalu uma lava o le Palemene o le atunuu.

E faatalofa atu i le tapuaiga a Ofisa Sili o Pulega o Matagaluega ma Faalapotopotoga tumaoti a le Malo, i latou o lo o faapena ona tua i ai le Malo i so o se feau ma so o se galuega i matata eseese o le Malo i lea Matagaluega ma lea Matagaluega, lea Faalapotopotoga ma lea Faalapotopotoga. Malo le galulue.

E faatalofa faapitoa i le tapuaiga a Samoa mai ona ao seia o o i ona iu, aemaise o le tapuaiga ma le nofo tatalo a le aufaigaluega tofofi a le Atua, o le a le toe o o i ai se faamatalaga, o le tulituli o le taimi, ae o lo o i ai nai mea e fia faaopopo i le lauga i le aso ananafi.

O lea o le a taoto ai. O le upu lava a toeiina ma le atunuu, o Samoa ua uma ona tofi, o paia lava mai le vavau e oo i le faavavau, pe oo i ai se leo pe leai, ia e le toe toesea se iota o paia ma mamalu o Samoa ua maea ona faataoto.

Ia, ae faapitoa se faatalofa i le faafogafoga mai a si ou itumalo pe le Gagaifomauga 1, malo le tapuai, faafetai tatalo, aemaise le aufaigaluega paia a le Atua. Ia masalo o lena sa maea ona tuuina atu i le aso ananafi nisi o vaega sa fia talanoa i ai le sui usufono e ala i le tuualalo ma le faamanatu

mai a si ou itumalo. O lea ou te manatua pe uma le faamatalaga i le aso ananafi o ou tatalo atu i tulaga foi o se siitaga o le aufaigaluega a le Malo o lo o gapatia, ua fai foi si umi ona o mafuaaga o lea ua fulisa tatou avanoa e pei foi ona avatu i le aso ananafi, aemaise o officers, senior officers, principal officers, vagana le vaega foi lea tau amata. Ia o le tatalo lena e pei ona tuuina atu i le aso ananafi. Ae ou te fia tatalo muamua i mea a si ou itumalo e pei ona avatu, e ui lava ina le o aafia i le Tala Faatatau Faaopoopo o le Tupe i nisi Matagaluega, ae tuu atu pea. Fai mai foi le upu, o le tuitui, tuitui, e tatalaina mai.

Lau Afioga i le Minisita o Galuega Tetele a lo tatou Malo lau Afioga Olo. Ua fiafia lava i le aso ananafi i le taimi o le iputi ua maua le avanoa e talatalanoa ai ma le Afioga i le Minisita ma faasoia foi i nisi o... faafetai lava i le faamanatu mai. Ia, talu ai nei lava na solo ai o i le va o Safotu ma Manase, o se tasi lea o mea na ou lauga faafia ai, ina ua maua mai le tala ua leva ona i ai le tupe e \$10 miliona na aumai le World Bank mo le galuega lea i le va o Manase ma Safotu i le tolotolo, solo. O se popolega tele lena o lo o nonofo ma lou itumalo, aemaise le taimi o le vaveao pe a oo nei ina timuga ma matagataga le palapala, e tasi se ala e sau i luga.

Faafetai lava i si tamalii o le isi i Manase, Taito Tiapili ma lana masini e taumafai atu e aveese ina ia kilia le gasolo mai o pasi mai o i Asau ma Falealupo e tuli mai le vaa o le taeao. Faamolemole ou te talitonu o oe o le Minisita, tulou, o upu tuusasa, e te maua lou taimi ma e te vae moemoe e vaai lea itumalo ma lea itumalo. E tatalo atu pe mafai ona speed up, po o le a se tulaga o taatia ai le galuega lea mo si ou itumalo, o la e faafogafoga mai. Ma na ou talanoa foi i toeaiaina matutua anapo, ou te vili atu o la e fai le latou evaga, ia matou talatalanoa ma fai mai, toe faamanatu. Ou fai atu, o lea na matou talanoa ma le Minisita, o la e ua silasila i ai, ae ou te le iloa tonu, atonu o le a e saunoa malamalama mai ai nai toeaiaina i le taatiaga la e ua i ai. Ae i ai le popolega i ina, o se otiga tagata ae maua se pasi, e matua leai lava se va, tu tele le tolotolo, faapea le auala, si tamai va lava sami, e leai se mea e alofaga pe ta i ai se taavale. So o le tatalo lea ma le agaga faaaloalo i lau Afioga i le Minisita.

O le isi vaega e fia... faamolemole, na ona faamanatu atu pe mata e maua sina fesoasoani, ua pogisa uma le matou nuu pe a oo ina po, ua tele ina pepe uma moli o le auala i pou foi ia i le aualatele. Ua matua pogisa lava. Po o fea e vave ona maua ai se fesoasoani, po o le mea ea faatalitali i le tatou poloketi foi lele se i maua atu se tupe, o lea e fia malamalama, po o fea le mea e maua ai le fesoasoani pe a faapea o lo o aafia le toe faiga o galuega ia i le tatou poloketi, a o lea e le i maua se tupe e faagasolo ai le tatou poloketi lea faamolemole.

E le gata i lea famolemole lau Afioga i le Minisita, o lo o taatia pea le talosaga ua fai si umi mo le vai o si o matou nuu lea e pito mai i Manase. Na e pei ona silafia o le nuu o turisi. E fia maua le vai mama, ua leva ona

avatu le talosaga i le isi vaega sa i ai muamua i le aufaigaluega, ae ou te talitonu ua taulalata ifo i ai se faaiuga a lau Afioga faapea le Ofisa Sili o Pulega ma le Matagaluega, alofagia le talosaga a lenei itumalo.

Ia, e avatu pea, e ui ina ua uma ona faailoa ma faapena foi ona taua i nisi sui usufono ua mavae atu, ae o mea o lo o tuualalo mai lou itumalo i le tatou vaalele foi lea. E avatu pea le sao o lou itumalo, leaga o la e faafogafoga mai. O lo o manaomia pea lava, e ui lava foi ina ua saunao ananafi le Minisita o la e ua taugofie mai pasese ua tele vaalele mai i ma o o le lalolagi lea o le a ui mai fea... ae pei o le naunautaiga lava o si nei itumalo, e tatau lava ona i ai se vaalele a si o tatou lava atunuu, aemaise la taimi tai pei o le taimi lea na tuanai atu i le taugata o pasese na i ai, e pule ai lava tatou i le fetuunaiga. E manaia le taimi a o i ai le tatou vaalele, lea ou te manatua na i ai tatou pasese e \$800, na kolopu i le isi aso i le \$600. Se e i ai isi atinae e maua mai ai mea e faatumu ai, ae ia faamama avega mo si o tatou atunuu i taimi faigata aemaise o taimi o faalavelave. E faapena ona tuutuu atu pea, e le poloaiina, e le faamallosia, ae o le agaga o le tauanau ma le alu atu i lalo. Fai mai o le tatalo filemu e liliu ese ai le ita, pe afai o ita se isi i le fai atu soo i nei mea, ae le mafai ona tuua leaga o la e augani mai ai nai itumalo. E tai pei lava o lea tatou te silafia uma. E tai pei foi la mo se faataitaiga o ita, e le i aumaia ita e se isi o le Palemene lenei, na aumai ita e si o ta itumalo ina ia avatu pea o latou manaoga. Pe fai faafia lava, a o la e ua faalogo mai o lea ou te faia le faatonuga a latou na aumai au e faaleo lo latou manaoga.

Ia, tasi lena tulaga, o lo o tauanau pea, e tuutuu pea i tafatafa o le Malo. O le matou itumalo, o se itumalo e ese le mapo o le pulega a toelaiina, e leai so ta fiapoto pe ta te alu atu fia fai i ai sota malamalama. Pau foi lea o le itumalo a fonu le matou Komiti, le Komiti lea e 15 lea e taitai ai le sui usufono, e saofafai ai ma faauluuluga o le matou itumalo, e nonofo mai lava i tua atu o le Komiti. A faalogo mai loa o se mea e le fetau, o i ina e aumai ai le latou tuualalo. Faalogo mai outou, e faapea ma faapea ma faapea. E nonofo i lalo e aumai le fautuaga ina ia aua ne i i ai ni fevesiaiga ma ni a ia malamalama e o pulea le matou nuu i mea ia o lo o manaomia e le matou nuu.

Se i fai lava sau tala i le tatou poloketi foi lea, ia ua uma ona ou talanoa i ai avatu foi faiga faavae lea na aumai e le Matagaluega a o malaga le Minisita, lea na umi lava le taimi na afio ai le Minisita i lana sailiga gasegase. Fai uma lava mea uma, faiga faavae na avatu, usitaia uma lava mea uma. Ae te i ua foi mai le Minisita. O le mea malie, e foi mai le Minisita ua leva ona ta alu fai uma lava mea sa manaomia ma resitala le matou... ae foi mai loa le Minisita aumai lana tusi. Ou toe oso i le vaa ou toe alu i Savaii, ia o le tusi lea na aumai le Minisita. Na pau lava lena o le mea e le i usitaia e le matou itumalo, o le faatonuga a le Afioga i le Minisita. Tuli mai au ou te toe alu e vaai le Minisita, ou alu faalua...

maumau pe a na nofo mai i i le Afioga i le Minisita. Ou fai atu, lau Afioga, ia ua ta toe oo mai, o lau tusi na avatu, e faamalulu atu, e le talia e toeiina, ua uma foi au augani, e le talia e toeiina, ona e eseese... e tai pei lava ona saunoa nisi o sui usufono ananafi, e eseese uma lava faiganuu, e eseese faiganuu.

O le tala na fai mai ia te au, alu e fai i le Minisita, malie lana afioga, talia uma lava, pe te HRPP pe te FAST pe te TAUTUA, o mea lava e masani ai le itumalo lenei, o le Malo lava e tulai mai, o le tatou Malo lena tatou te o e opogi. O lena lava ou te avatu le taatiaga o le matou itumalo, e le iloa... E aumai la le faatonuga a le Minisita ou alu atu fai mai toeiina, alu e fai i ai, o lea ua uma ona fai le finagalo o le nuu, ua uma ona resitala sui, e leai lava ma se tonu a le sui usufono na fai. Ua ou malamalama foi ia i latou, once e decide toeiina nei e faia le nuu, aua latou te malamalama lelei i tagata nei ua tofi, o lena. Fai i ai faamolemole e le toe suia le tatou, ae afai e leai, faafetai tele lava. E tiga ona matitiva Savaii, ua masani i le mativa, masani i le tagiilima, tatou te le fia fai \$1 miliona. Ae pau le mea e manao ai, e le fia pulea mai e se isi totonu o le itumalo. Na ona ou faamatala ina ia malamalama i totonu o lou itumalo, o le faigata ia ona ou faia se tonu na o au faapea o le sui usufono e Taitaifono, no. E leai se malosi o le sui usufono i i, matou te talanoa, soalaupule ma faamalamalama. Ia pei o mea na o lea ta te taumafai e faamatala atu i le tulaga o le matou itumalo.

O lea la e pei ona faafofoga i le aso ananafi lou taumafai atu i vaega esese, na ou talosaga i le soifua maloloina, talosaga i ovataimi, ou talosaga i alauni, talosaga e faatumu avanoa o lea Matagaluega ma lea Matagaluega ma lea Matagaluega, ae...

Susuga Hon Laauli Leuatea Polataivao Fosi (Minisita mo Faatoaga ma Faiga Faiva): Lau Afioga i le Fofoga Fetalai...

FOFOGA FETALAI: Ia, malie le sui usufono mamalu se i tuu atu le avanoa i le Afioga i le Minisita.

Ia se i tulai mai lau Afioga i le Minisita mo Faatoaga ma Faiga Faiva.

Susuga Hon Laauli Leuatea Polataivao Fosi: Ou te tulai foi ma le ava ma le faaaloalo tele i leni taeao fou e faatalofa atu i le paia ma le mamalu o le Maota, faapea foi le faafofoga tapuai mai a si o tatou atunuu.

E leai ua ou tulai ona o le mataupu lea ua oo i ai le saunoaga a le sui usufono mamalu. E manatu lava e le vaea le falaooto i le va faafeagai ai o le pulega a alii ma faipule ma lo tatou Malo, leaga o lea e faalogologo uma itumalo o le atunuu, faalogologo mai le pule mamalu a alii ma faipule i le taumafai atu o le faigamalo i le tatou poloketi lenei. Tulou Samoa, e leai se agaga o le faigamalo e pulea atu e le tatou faigamalo le pule mamalu a alii ma faipule i totonu o le pulega masani. E tatau lava ona faamanino le

tulaga lena, leaga o lea e le o afio mai le Afioga i le Minisita e a ia le tusi na momoli atu i lau Afioga i le Tamaitai sui usufono. A o le itu lea e popole ai le taofi, ina ne i matau mai Samoa i tu ma aga, tulou lava, Faimalotoa, o le Gagaifomauga 1, 2, 3, o le aiga. Ina ne i meaane ua i ai le agaga faapea ua faatonu atu e le Matagaluega ma le faigamalo le tatou nuu. Ae a faataatia loa tulaga o upufai o Malo ma le faigamalo ma le pulega a le Malo i mataupu e momoli atu i le tatou nuu, ia ona fefulifulisai lea o le tofa ma le faautautaga i le mea e toa i ai le nofo lelei ma le fesootai ina ia manuia le nuu. Ou te malamalama lelei i le tulaga o lo o i ai faiga faavae ma mea i totonu o le nuu. Ae a avatu la fautuaga a le tatou faigamalo i se atinae ua manatu le Malo e tataua ona fai ae i ai le tulaga lea e faapea mai e le talia, o le upu lena, leaga o lea e faafofoga le atunuu, o lea e faafofoga foi le paia ma le mamalu o isi itumalo, o lea e taumafai nei e foia faiga faavae ia e momoli atu. A avatu loa le tuualalo a le Matagaluega ma le Minisita ma le Komiti lea e tau faafofoea, ona tofamalie lea o le faautaga i nuu ma itumalo e pau lea o le auala e alu ai i luma le poloketi lenei. O lau lea tuualalo. O le tatou o e fau faatasi le auga ina ia taunuu le poloketi. Aua o aiaiga ma faiga faavae ia e momoli atu e le Malo ma le Minisita, e laugatasia, ia mulimulitaia, aua ne i i ai se mea e tasi, e fai lava le loto, tulou lava, e fai lava le finagalo o le itumalo ia i le mea e finagalo i ai e uiga i le poloketi.

A o le faaoololomaau lena i lau Afioga i le Tamaitai sui usufono, o lau Afioga o le itumalo i le va faafeagai ai, o lea e afio atu le Matagaluega ma le Minisita, musumusu i toeaia, e leaga le faataumatatao pe toe tulai mai e fai le isi tulaga e tupu ai ni feteenaiga tatou te le manaomia. A o le faaoololomaau lea e avatu, o lena tou te silafia lelei le iuga o le ntatou faiga palota, na tuufau lava le faaiuga e fai e le tatou nuu. A o le manumanuga, ne i meaane ua faapito manu ia tasi, ina ia fefulifulisai ma ia paleni lelei le faaso.

O le agaga lea ua ou manatu leaga o la e faapea mai, ia ave tou \$1 miliona pe a tou le mananao ai. E le o le agaga lena. E le o le agaga lena o lea e molimoli atu, a o le autu ma le faamoemoe, ia outou alofagia le mea e laugatasia uma ai tatou itumalo, ina ia alu i luma le tatou faamoemoe e atiae ai si o tatou nuu i Safotu.

E pei o si au toe fesoasoani atu lea lau Afioga i le Fofoga Fetalai ina ia manino ma faamalamalama lea tulaga.

FOFOGA FETALAI: Faafetai. Malo foi saunoa i lau Afioga i le Minisita. Atonu o lea ua faafogafoga mai foi le sui usufono mamalu, ia sa tau fai atu ai lava se fautuaga a le Nofoa ona o lo o i ai lava ala o mea e faatino e tatou nuu ma afioaga, ia aemaise foi e le o nofo mai le Afioga i le Minisita e ana le tusi lea ua taua e le sui usufono mamalu. Ae o lo o i ai lava auala e foia ai faafitauli, ia e le o se faafitauli tele foi, o mea lava e

fetuutuunai i le tofa ma le faautaga ma le moe e maua ai le filemu. A o le agaga o le Malo, ia o lea ua folasia e le Afioga i le Minisita.

Ia, tulai mai lau Afioga e faamaea mai lau saunoaga ua maea lou taimi.

Tofa Hon FAIMALOTOA KIKA IEMAIMA STOWERS-AH KAU:

Faafetai i le faauilavea a le Afioga i le Minisita. Faafetai lava tulai mai Laauli, o la e faafogafoga mai lou itumalo o lea ou te faamatala e pei foi ona ou fai atu, o le faaiuga a lou itumalo, e tatau ona ou usitaia pe a ua uma ona ave i ai le fautuaga. Na aumai loa le mea lea ou oso i le vaa ou alu i Savaii tuu le tusi i toelaiina, paga lea, e leai ma se mea o tupu i le matou itumalo. E pei ona ou faailoa atu, e ese le usitai, e ese le faigofie, e ese le lagolago. E leai ma se mea o tupu i le matou itumalo. Ae na pau le mea lea na ou fia failoa atu, o le Komiti na tofi e toelaiina, e tasi lava le sui na malie toelaiina o le a see ese le faauluuluga o le matou nuu mai totonu o le Komiti ae avatu le sui e toatasi, le sui lea na tamoe i le palota i totonu. A o le Komiti atoa ua uma ona resitala, e le i mafai ona... na ou sau foi ma le poloai ou fai atu, maumau pe ana nofo mai i le Afioga i le Minisita, pei o lo o fia feiloai mai lou itumalo i lau Afioga i le Minisita ma lau Matagaluega.

O lea na ona ou taumafai e faamatala atu le mea o tupu, ae leai se faatautee, leai se faatautee.

FOFOGA FETALAI: Malie le sui usufono mamalu, o lea ua maua lou finagalo ona o lea e faasolo le tatou taimi ma le tatou galuega, a o lea ua maua lou finagalo, o lea foi ua faafogafoga atu le Malo. Ia, a o le tele lava o mea ia e te saunoa ai, o mea na e patino lava i lo outou lotoifale ma le Matagaluega ma le Minisita. A o le faasaoina o le taimi lau Afioga i le sui usufono mamalu lea ou te talanoa atu ai.

Tofa Hon FAIMALOTOA KIKA IEMAIMA STOWERS-AH KAU:

Faafetai lava lau Afioga. E leai se tulaga e faatautee i le faatonuga a lau Afioga i le Nofoa, ae ou te le iloa foi po o le a se leaga o lea ou te fia faamalamalama ina ia malamalama le Maota i le tulaga o lou itumalo, ae ua lelei o le a ou see ese.

Ia o le a faaiu atu ona o le tele ia o nai mea ia na ou fia talanoa ai, ae paga lea, o le a ou faaiu mai la i le Afioga i le Tamaitai Minisita o Tupe. E momoli le faamalo ma le faafetai i lau Afioga i le Minisita faapea le Matagaluega i le saunia foi o le tatou Tala Faatatau Faaopoopo o le Tupe Muamua e pei ona opea nei i totonu o le Maota ma tatou felafolafoai ai. Na ou fiasia lava i le tau faaiuiuga o lau folasaga i le faataatia maiga i le faaiuga o le tatou Fono i le tausaga na tea nei na faaiuiu ai lau saunoaga, e leai se mea e popole ai, o lo o sologa lelei le tamaoaiga o si o tatou atunuu. Na ou toe faagaetia atili lou fiasia i le aso ananafi ina ua toe tulai lau

Afioga i le Tamaitai Minisita e faafoi ni saunoaga a se tasi foi o sui usufono na faapea, ia, pe ua le lava ni tupe, o se mea faapena pe a ou manatua lelei. Na ou matua alu ananafi ma lou fiasia aua o lea lava e i ai faafesili i le tele o saunoaga a tagata ta te faalogologo i ai. Ta te savalivali lava ma ota faalogologo ma ota matau. Faafetai tele lava, o lo o mautu le tamaoaiga o le atunuu.

O mea uma la ia na ou talanoa atu ai ananafi faaopoopo atu ai ma nai mea i le taeao nei, o le tatalo a lenei sui usufono e ala i fautuaga a lou itumalo, afai o lea e mautu ma lelei ma mapo le tamaoaiga o Samoa, aisea le mea ua le faatumu ai avanoa? Aisea le mea ua le totogi ai ovataimi? Aisea le mea ua le aumaia ai le tatou \$1 miliona lea le tatou \$800,000 muamua?

FOFOGA FETALAI: Ou te fautua atu i le sui usufono mamalu, ua uma ona e taua ia vaega uma i lau saunoaga, ae faauma maia le saunoaga ua uma lou taimi.

Tofa Hon FAIMALOTOA KIKA IEMAIMA STOWERS-AH KAU: Ia, o le agaga lena. Ae faamatuu mai pe afai ae se i galulue aua ua toa le... ua leai ni galuega o fai, ua leai se tupe e totogi ai ofisa e tolu, ua leai se tupe e totogi ai. O lea ua nofonofu, ua le iloa e matou po o le a le isi laasaga, ona o lea foi e le o iloa pe lavea matou i le... o lea ua ou faalogo i le isi vaega ua avatu latou tusi, ia a o lo o tuufesili pea pe i ai se matou tupe pe leai. Ua fai uma lava mea na manao ai le Matagaluega, na faapena foi ona oo atu le Matagaluega talanoa ma le nuu i le prioritise ina o mea e ave i ai le faamuamua a le poloketi.

E pei o le tatalo lena a lenei itumalo, e tatalo atu, afai ua lava le tamaoaiga, faasoa mai, ua taugata tele le soifua. Ia, faafetai i lau Afioga, ua lava ia ia tala, ae o le tatalo ma le aioi lena, ina ia faapena ona faamatuu maia se mea se i tali ai nai tagata o lo o tufesili mai, ua leai se mea e tua i ai. ma le agaga faaaloalo lau Afioga, faafetai mo lou avanoa.

FOFOGA FETALAI: Ia faafetai o lea ua faamaea mai le saunoaga a le sui usufono. Se i tulai mai lau afioga i le Sui Palemia.

Afioga Hon Tuala Tevaga Iosefo Ponifasio: E tulai atu ma le ava e tatau ai lau Afioga i le Fofoga Fetalai, aemaise foi le ee o le paia ma le maualuga o le Palemene i lenei taeao. E faatalofa atu i lenei taeao aemaise foi o le alafai mai i manu aua le puipuiga a le Atua e pei ona agai i ai lau afioga i lenei taeao. e pei ona tamua Lona viiga, e fia fonu faapipii atu i le tulaga lea.

Ua ou tulai atu ona o le mataupu lava lea i tagata faigaluega a lo tatou Malo. Ua toatele foi sui usufono ua tulei saunoa i le tulaga lea ua tatau ona

fai se siitaga o totogi mo le aufaigaluega a le Malo. O lo o faapea foi ona aumai lua ai ma le isi vaega, ua taofi avanoa o tagata faigaluega a le Malo.

Lau Afioga i le Fofoga Fetalai, ou te fia tautala i le vaega lea ona e pei ona tuuina mai e le sui mai Samatau ma Falelatai, aemaise foi Vaimauga 1, o lea foi na tulei saunoa i ai le sui usufono mai Gagaifomauga 1, ia e ao tuuina atu se faamatalaga ona o lea ua aumai, ua leai ni alauni ua leai ni pasene ua leai ni tului, aemaise foi ni ponesi a le PSC, o le isi lena vaega. O lea foi na saunoa le sui usufono mai Gagaifomauga 1, o nai upu lava na taua e tau fologata foi ma i ai foi lagona e ono lagalaga, ua faapea mai o nai tamaiti ua iu mai i Iunivesite ma o latou faailoga, ua na o le valiano i inei, ua na o le nofonofu atu ae ua oi. O nai upu ia e i ai le tulaga foi lele, e ono...e pei e faaaina ai lagona o nisi o lo o faafogafoga mai i le saunoaga. O le upu lava lea o le valiano, ou te le iloa po o se upu Samoa, ae a ou faauigaina, e pei o se...e omai foi lele o nai tamaitai mai fafo, e na ona pulapula o latou mata, e pei ou te faatusaina i se tamaititi, o la e ai le aisakulisi a le isi tamaititi, ae la na o le sioa le isi tamaititi e leai sana mea o maua. A ta faauigaina la i le context po o le tuuina mai o le saunoaga, e fai lava sina ogaoga i le faafogafoga mai, aemaise foi o lea e faafogafoga mai le aufaigaluega mamalu a le Malo. E ao la ona faamatala atu nai mea ia, ina nofo silafia ma manino foi le tatou Palemene, i le mafuaaga o nei mea.

Mo le silafia, o le vaega lea o tagata faigaluega a le Malo, o i lea o lo o ave ai foi le faamamafa. O lea ou te talanoa atu, ona o lea vaega o lo o nafa ma le Tamaitai Palemia, ona o au lea o lo o tauave le vaega lea i le taimi nei, ae o lea ou te malamalama lelei i le tulaga, o i lea e ave i ai le faamuamua a le tamaitai Palemia, ina ia fetau tulaga e faataoto mai ai vaega lea o le aufaigaluega a le Malo. O lo o silasila totoa le Malo i vaega ia o le aufaigaluega ona o le taua, o le lelei, aemaise foi o le sao o le tulaga e faatulaga ai le aufaigaluega a le Malo, mo le fuafuaina lea o tupe maua, aemaise foi tupe o lo o faaalu e le Malo i totonu o le aufaigaluega.

O le upu moni lava o le aufaigaluega a le Malo, e vae ma lima i ai lo tatou Malo, aemaise i ana fuafuaga e fai. E faataua tagata faigaluega, ona o i latou o lo o fautuaina le Malo i ana faaiuga fai, aua se manuia o lo o tatou atunuu.

E tatau la ona manino le Malo i le faataotoga i tulaga uma o lo o i ai le... fuafuaga uma a le aufaigaluega o lo o faigaluega ai alo ma fanau a le atunuu, aemaise foi ia tamalii ma punaoo, o lo o faapena ona faatinoina le auaunaga i lo tatou Malo. E le faatauagavale foi le Malo i le vaaiga o le aufaigaluega, ae ao ina manino i tulaga uma o i ai.

E pei ona silafia o le la Itu ma lenei Itu o itu uma lava o le aufaigaluega a le Malo. O i tatou uma lava o ni auauna. A maua so outou totogi, ma so matou totogi, aemaise o se totogi o le aufaigaluega, e na o se mea e talamasineia ai le auaunaga. Ae a maua sina ovataimi, a maua sina alauni po o se malaga foi i fafo, ia faafetai. Ae o tatou uma lava o lea na tatou

omai tatou te auauna faatasi ma le Malo, ia maua se manuia o lo tatou atunuu.

O lenei fuafuaga a le Malo, e le o aafia ai ia SOEs po o Faalapotopotoga Tumaoti a le Malo, ua patino lava i Matagaluega, i lalo o le vaavaaiga a le PSC. E fia tuuina atu nai fuainumera ia e fesoasoani foi i se tala e fia fai atu.

Mo le silafia o le 80% o tupe faaalu a lo tatou Malo, po o tatou po o le total expenditure i le paketi 2022/2023, o tagata faigaluega e 80%, e le o se tupe laititi. I le faataatiaga mai o le Tala o le tupe 2022/2023 na faamauiina ai le siitia o le aofaiga o tagata faigaluega a le Malo e tusa ma le 11.2% ua sii ai le aofai o tagata faigaluega mai le tulaga sa i ai i le tausaga na tea nei. O le fesili pe aisea? O le siitaga lea o le faitauina o tagata ua siitia o le aufaigaluega a le Malo, ua aafia ai le tulaga o le paketi. A faaliliu tupe i le siitia lea o tagata faigaluega ona maua lea o le 20% o le tupe faaopoopo i luga o le Tala Faatatau o le tupe. O lona uiga o le 20% ua faaopoopo i luga o le paketi, ua faamalie ai le 11 lea o le faaopoopoga o tagata faigaluega a le Malo.

Ua tataua ona toe vaavaai ma toe faia se iloiloga po o se review o le aufaigaluega a le Malo, ina ia fua i luma, ia i ai se vaai mamao, ma ia aiga ma fesootai paketi ma tupe fuafua foi a le Malo, ma le faatulagaina o galuega ma totogi o le aufaigaluega a le Malo. Ia fetau foi, le tagata ma lona tulaga ma ona tiute tauavae, aemaise foi o lona agavaa, ma le totogi o lo o ia mauaina. O mea uma ia o le a alu i totonu o le review. Ia toe asiasi le isi vaega lea, e pei saunoa foi nisi o sui usufono, o avanoa mo i latou ua iu mai ma faailoga i Iunivesite po o graduates ona e le i i ai lava se tupe faatatau pe na faaagaaga mo i latou i paketi ua mavae i le tele o tausaga ua mavae. O le taua lea o le review. O lo o toe iloilo foi tupe faaagaaga...

Tofa Ale Vena Ale (Faleata 4): Lau Afioga i le Fofoga Fetalai pe maua se avanoa...

FOFOGA FETALAI: Malie le sui usufono mamalu, se i maea pea le folasaga ale Taitai o le Malo i lenei vaitaimi ona tuu atu lea o le avanoa pe a i ai se sui usufono e... lau afioga i le Sui Palemia.

Afioga Hon Tuala Tevaga Iosefo Ponifasio: O lo o toe iloilo foi tupe o lo o faaagaaga e le Malo i lalo o ana tupe faatatau e faaalu i totogi o le aufaigaluega. E vaavaai foi i le iloiloga o tomai po o le current skill based le agavaa o lo o i ai tagata faigaluega iinei aemaise o le agavaa po o tomai e tataua ona ave i ai le faamuamua a le Malo i le fuafuaina lea o ana sikolasipi aemaise foi o nisi o faamanuiaga o le auina atu lea o alo ma fanau po o tulaga faapena. E tataua ona i ai se long term skill priority e tataua

ona silasila i ai le PSC aemaise o le malo mo le auina atu o alo ma fanau i aoaoga i fafo.

O lo o i ai le fuafuaga a maea le review, ona fai lea o le taskforce plan. E tatau lava ona i ai se fuafuaga mamao a lo tatou Malo, e limataitaina ai le faafaigaluegaina o tagata a le Malo, aemaise lona faatulagaga i le tulaga o totogi, aemaise foi o isi mea e o faatasi ma totogi, e pei o incentives, po o polokalame ia e faaosofia ai le lagona fia faigaluega o tagata, e pei o sikolasipi, o livi ma aso malolo. O mea uma faapena e ese le taua e tatau ona silasila totoa i ai le PSC ma lo tatou Malo. O le isi foi tulaga taua, o le vaai a le Malo i le afaigaluega a le Malo, e tatau foi ona atinae o latou tomiai, ia aua ne i gata ina ua foi mai fafo, ona sau lea faigaluega. Ae ao i le Malo, ona faalauaitete le tomiai agai atu i fafo i seminar. O lo o i ai foi short term scholarship, sikolasipi tai masina, tai lua vaiaso, tai tolu masina, o lo o auina pea i fafo o tatou tagata i le taimi lenei, ina ia aoaoina ma siisii pea i luga le tulaga o le tomiai ia aua ne i gata.

E i ai le isi sui na saunoa mai, fai mai...

Tofa Hon Laufo Fonotoe Nuafesili Pierre Laufo (Anoamaa 2): Lau Afioga i le Fofoga Fetalai, o lea ua ou toe faanoi atu i lau afioga, e pei ua foliga mai o lea ua tali le afioga i le Minisita ae le i uma atu lauga faamolemole...

FOFOGA FETALAI: O le manatu foi o le Nofoa, ona ua fai si tele o lauga ua aafia ai totogi ma alauni, e pei o le manatu lena ua tuu atu ai le avanoa i le Taitai o le Malo ina ia faamanino, leaga ua tele lava lauga i le mea lea. Sa ou manatu foi lele e taatia se i tali le malo i se taimi, ae ua matau atu, o lea lava e lauga mai, lauga mai. O le agaga lea ua manatu ai, e tuu pea le avanoa i le Sui Palemia o lo o vaaia le Malo i lenei taimi, se i faamaoti mai vaega ia, aemaise o le mea lea fai mai ua freeze alauni ma mea uma faapena, leaga o lea e faafogafoga le atunuu.

Tofa Hon Laufo Fonotoe Nuafesili Pierre Laufo: E pau lava le mea ou te tulai atu ai lau afioga, ona ne i maea le saunoaga faamalamalama a le afioga i le Sui Palemia, ae laga atu nisi mataupu e le o tau i ai lana faamalamalama. O mea foi ia e saunoa i ai, o lea lava tatou te malamalama uma iai, e le o ni mea fou foi i le faalogo. E i ai nai vala o mea ia, ou te iloa e i ai isi mea taua lava ia e le i saunoa atu ai, ne i uma lana saunoaga e le i pai i ai, ona toe tulai foi lea i se isi taimi, toe faamalamalama foi lea o isi mea. Ae pei o le talosaga ma le faaloalo.

FOFOGA FETALAI: Malie, malie mai lau susuga i le Sui Taitai o le Itu Agai. O lea lava e faafoefoe atu e le Nofoa le tatou Fono. O le matau foi a le Nofoa ua tele lava sui usufono ua lagalaga mea o le PSC ua freeze,

o a ea o alauni. E le o se mea taugofie o lea e faafogafoga ia Matagaluega a le Malo. Ia te au foi la o le Nofoa, ou te tuua le avanoa i le Sui Palemia se i oo lana saunoaga i mea ia, ona ua fai si toatele o sui usufono ua talanoa i ai. O lea foi e i le Sui Palemia le tofa, e aua nei toe oo i ai pe a oo i le taimi o le Malo, e faapena ona fetuutuunai. Ae ona o le galuega a le Nofoa, aemaise o lea e faafogafoga aemaise le mamalu o le aufaigaluega a le Malo, aemaise o le atunuu. Ia outou maua mai le agaga o le Nofoa, o lea lava e faafoefoe atu ina ia paleni mea uma.

Lau afioga i le Sui Palemia e manaia ae le ootoo mai. O lea ua pai lau saunoaga i le review mo le lumanai. Ou te talitonu o details ma isi mea na, e lafo atu lava i lau afioga ma le Kapeneta o le matafaioi lena a le Kapeneta. Ae ua ou manatu mo le faafogafoga a le Maota, o lea e pei ona tulai mai le Sui Taitai, ia o lena. O lea ua maua atu, o lea ua silasila totoa le Tamaitai Palemia ma le Kapeneta ina ia toe review atoa ia totogi ma mea faapena mo le agai i luma. O le fesoasoani atu lena i lau afioga. Ua lava ma toote foi ou taimi e toe tuu atu ai i le Malo pe a maea saunoaga a le mamalu o le Palemene.

Tofa Ale Vena Ale (Faleata 4): Lau Afioga i le Fofoga Fetalai pe maua se avanoa

FOFOGA FETALAI: Mo le faasaoina o lou taimi, se i tulai mai le igoamatua, Ale.

Tofa Ale Vena Ale: E faafetai i lau Afioga i le Fofoga Fetalai, o le itu foi lea, o lea na ou fia tulai atua i, ona e foliga mai o lea ua tali le afioga i le Sui Palemia. Ae ui i lea, o lea foi e fia avatu foi se mataupu a le matou nei vaega nei e toatolu. Ae ua ou matua onosaia lau Afioga i le Fofoga Fetalai lau faatonuga. Faafetai.

FOFOGA FETALAI: Ioe, o lea foi e faafogafoga mai le Sui Palemia, o le manatu lena, e na ona pai lava i le vaega lea o le PSC ma alauni, a o le atoaga e i ai se taimi o lau Afioga ma le mamalu o le Kapeneta. O la foi e foufou ma sa o le nofo tolu la e tuu mai o, e i ai se taimi. Ma le agaga faaalalo. Tulai mai lau Afioga i le Sui Palemia.

Afioga Hon Tuala Tevaga Iosefo Ponifasio: Faafetai tele i lau afioga i le Fofoga Fetalai. Atonu e leai se afaina pea avatu loa lau tali maoti i lena taimi. E mafai foi ona outou toe lauga mai ai, ona o lea ou te iloa, e toe maua le isi ou avanoa. Ae o le popolega ona ua agai uma saunoaga i le tulaga lea, ona e pei ona ou fai atu, e oo i se tulaga e faaaina ai lagona o tagata. ae lelei le tuu atu ma taofi toe faaauau i le taimi. Ae tatau pea ona silafia ma le nofo malamalama, i le taua o le tulaga lea, o lou popolega lena.

Ae onosai mai e le toe umi sau faamatalaga. Ua uma tulaga e pei ona agai i ai saunoaga, o le tofa ua ae i lo tatou Malo, ina ia vaavaai totoa i le taua, e pei ona ou fai atu, o le lelei ma le sao o se fuafuaga o le manuia foi lea o le agai i luma o le faamoemoe i tagata faigaluega a le Malo.

Sa taua le tulaga lea o totogi, o totogi faapea e sii ia totogi. E pei o le mea foi lena ua avatu ai se faamatalaga, ona sa ou faalogologo lava pe i ai lava se saunoaga e afea se mafuaaga tataua pe talafeagai foi e faavae ai le siitaga lea ua outou saunoaina. E pau lava le mafuaaga na ou faalogo atu i ai, ona ua taugata le soifuaga. Ia o atugaluga ia, o lea ua tatou agai nei i tagata faigaluega a le Malo, ae leai ma se isi na afea tagata faigaluega a Faalapotopotoga ma Kamupani Tumaoti, e faapefea i latou. E le sii e le Malo tagata faigaluega ae toso tagata faigaluega a Kamupani ma Faalapotopotoga Tumaoti. E faamalulu atu lava i le tulaga lea. A na fai sa outou research ua outou aumaia fuainumera ia na ou avatua ananei, atonu e maua la outou tofa ma la outou faautaga. E taua le tulaga lea, ona silasila foi o tagata faigaluega a le Malo, e secure a latou galuega, security of employment. Ina ua tulai mai le koviti, sa faigaluega pea tagata o le Malo, sa maua o latou totogi, sa maua o latou alauni, sa maua o latou ovataimi, o lo o tauave pea o latou aso livi, a o nai tagata o Faalapotopotoga Tumaoti ma Kamupani, na tuli i le fale ua leai se galuega mo outou. Ua silafia foi e le tatou Palemene, e umi le tatou taimi o le vavao ma tulaga o le Koviti, ia o le eseese lena. E ao pea ona tatou sialsila i le lautele ma le vaai mamao, ne i tulituliapu ia tagata faigaluega a le Malo, ae o lo o i ai lo tatou Malo, o lo o mataituina foi le tulaga le ai tagata faigaluega ma conditions foi o employment, po o le faaleleia lea o nofoaga ma tulaga uma o mea e faatino ai galuega, o lo o i lalo uma o galuega a le Malo. Ae o le faanoanoaga e le o i ai se mafuaaga tataua, e faavae ai le siitaga lea o lo o outou aumaia e pei ona taua.

Afioga Sulamanaia Fetaiai Tauilili Tuivasa (Vaimauga 1): Pe maua se avanoa lau afioga i le Fofoga Fetalai?

Afioga Hon Tuala Tevaga Iosefo Ponifasio: O le sui usufono lea lau afioga, o ia e ana ia le mafuaaga lea.

Afioga Sulamanaia Fetaiai Tauilili Tuivasa: E fia maua se avanoa e fesoasoani atu i le...

Afioga Hon Tuala Tevaga Iosefo Ponifasio: Le mafuaaga lea o le taugata o le soifuaga, e tataua ai ona sii le totogi. E pau lava lea o le mea ma afea i lana saunoaga lau Afioga i le Fofoga Fetalai,

FOFOGA FETALAI: Ia malie le sui usufono, se i faauma atu pea le saunoaga. E mafai foi ona ou toe tuu atua se isi avanoa. Ae se i faamaea mai pea le saunoaga a le Sui Palemia, ona maua ai lea o se isi avanoa.

Afioga Hon Tuala Tevaga Iosefo Ponifasio: Lau Afioga i le Fofoga Fetalai e manaomia lava e lo tatou Malo ni mafuaaga tatau, e faavae ai ni lagona ma ni manatu ae aua le aumaia i lagona faaletagata. Pe fai fai se tou tonu omai lea faapa mai. Ae lelei le aumai o ni mea aanoa, o lea e faafofoga atu le Kapeneta ma lenei Itu o le Maota. O le tala lea lau Afioga se taimi toe maua sou avanoa ae faafetai mo lou avanoa i lenei taimi.

FOFOGA FETALAI: Faafetai o lea ua manino lea vaega o le PSC ma avanoa ma tulaga uma ma faamoemoega mamao a lo tatou Malo le Faigamalo. Se i tulai mai leaga o lea sa e saunoa foi lau Afioga i le sui usufono.

Afioga Sulamanaia Fetaiai Tauiiili Tuivasa: E faatalofa atu foi i le maualuga o lenei taeao fou, i le alafai mai foi o le fonousu a le atunuu. Faamalo i lo tatou valaauina, a o lenei itumalo, leaga o lea na aafia i le saunoaga a le Sui Palemia. E fesoasoani atu i le Nofoa e tumu i le ava ma le faaaloalo. Ae pei o lea ua taua i le saunoaga a le Sui Palemia lenei itumalo sa lotea i le tulaga o lau lauga. E pei o le mea foi lenei sa tulai atu ai le taitai, e fesoasoani atu, o lea lava e tautaofofi mai lava le matou Itu, ae o lea e faapea matou ua tali le la Itu.

Ae o lana saunoaga e le matagofie i lana faalogologo, manatu faaletagata, ae o a mea nei? O ni manu mea nei, e pei e faapena le uiga, ae aua le aumaia ia manatu faaletagata ma ni mea faufau.

FOFOGA FETALAI: Ou te fesoasoani atu i le sui usufono. O lenei ua ese foi le tala lenei ua fai mai.

Afioga Sulamanaia Fetaiai Tauiiili Tuivasa: E leaga o lea e fai mai, o lea faatoa uma nei lava le saunoaga a le Sui Palemia, e pei ni manatu o tatou...

FOFOGA FETALAI: Aumai i se auala foi lele faamatai, ae aua le aumaia i auala faapena.

Afioga Sulamanaia Fetaiai Tauiiili Tuivasa: Lau afioga i le Fofoga Fetalai, leaga o lea na ou taua, o lea foi sa taua i lau lauga le siitaga o totogi o le aufaigaluega a le Malo. O le agaga lea na avatu, o le tuualalo, o lea foi na saunoa mai pe faapefea tua... A tau loa le Malo e lavea uma lava Faalapotopotoga Tumaoti. O le Malo lenei, tatou te le oo atu i Kamupani, o

tagata lava ia. A o le Malo pe public service po o fea uma vaega a le Malo Tumaoti, o le agaga lena a le Malo. Ae o le agaga lea sa avatu ai le tuualalo i lena Itu, se i silasila po o le a le mea ua toe fai ai lenei review. Ae fai foi le review, e amata mai i le principal level. O le agaga sa i ai le sui, a fai le review amata mai i le...

FOFOGA FETALAI: O lea ua ou maua lou finagalo.

Afioga Sulamanaia Fetaiai Tauiiili Tuivasa: A o le isi popolega o le sui usufono, lau afioga i le Fofoga Fetalai, o tatou lava tagata lea ua toe fai ai le review, a uma ifo nei le review o le a le umi ae vaea ni tagata faigaluega, o le popolega lena sa avatu ai le agaga. A o lea ua tolu Paeaiga leai lava ma se faamanuiaga mo le aufaigaluega. O lea foi na saunoa lau Afioga i le fofoga Fetalai, e leai ni mafuaaga tataua e ala ai ona sii, a leai ni mafuaaga tataua ua le mafai ua i luga le tau o le soifuaga, ae o lo o i lalo ia totogi.

FOFOGA FETALAI: O lea ua faatonu atu le Nofoa.

Afioga Sulamanaia Fetaiai Tauiiili Tuivasa: Ia ava ma faaaloalo le sui usufono lenei. Ia manuia le Fono.

FOFOGA FETALAI: O lea ua maua lou finagalo, o lea foi ua tali le malo i le review, o le tali lava lena a le Malo. Tatou onosai, o le faigamalo ua tulai mai, o lea ua i ai le latou fuafuaga mamao. O le mea lea onosai tatou, o le mea lava ua i ai le finagalo o le Faigamalo, ia o lena, i lenei vaitami. E pau lava le mea ia tatou tatalo, ia taunuu mea uma i le manuia aemaise o le manuia o le atunuu. O le agaga lena, e manatu foi lau afioga i le sui Palemia ou te iloa foi o lea ua faauma atu e le Nofoa lea tulaga, ina ne i avea foi ma auala e faaumiumi ai le tatou mataupu. A o lea ua avatu le tala a le Nofoa, o lea ua faafofoga mai le sui mamalu lea, o lea ua saunoa lau afioga, o lea e tapena le review a le Malo, ia o le tali lava lena a le Malo. O le mea lea, malilie a tatou sui usufono.

Afioga Alaiasa Moefaauouo Malagaitutogiai Sepulona Moananu (Anoamaa Sasae): Lau Afioga i le Fofoga Fetalai...

FOFOGA FETALAI: O lea o le a e lauga i le Tala Faatatau Faaopopo o le Tupe pe...

Afioga Alaiasa Moefaauouo Malagaitutogiai Sepulona Moananu: E leai na o ni nai mea lava ia sa aafia i le saunoaga a le Sui Palemia.

FOFOGA FETALAI: Malie, e i ai le taimi e tuu atu ai le avanoa ona e saunoa lea.

Afioga Alaiasa Moefaauouo Malagaitutogiai Sepulona Moananu: E pei ua tuuaia ai matou fai mai e le i faia ni a matou suesuega, e fai si ogaoga o le faalautega o le saunoaga a le afioga i le Sui Palemia. Ia o matou foi na faigaluega i le Malo, e malamalama lelei i le mea. E i ai isi tagata e le i faigaluega i le Malo lea e ala ai ona sau fai le mea o le review, aua e le malamalama i faiga faavae a le Malo. Lau Afioga, e lagolagoina le review ina ia faalelei ai tagata ma tulaga o le alu i luma o le Malo, leaga o lea e fou mai le ae aua le tuuia faapea e lei fai ni matou... e leai e malamalama lelei lava i mea ia e tutupu i le Malo. Ma le faaaloalo.

FOFOGA FETALAI: Malo...

Tofa Hon Lauofo Fonotoe Nuafesili Pierre Lauofo: Lau afioga i le Fofoga Fetalai ou te tulai atu e... o se mea e fia malamalama

Susuga Hon Laauli Leuatea Polataivao Fosi: Lau afioga i le Fofoga Fetalai e fia maua se avanoa.

FOFOGA FETALAI: Ia malie lau afioga i le Minisita se i tuu atu i i ona tuu atu lea i lau afioga.

Tulai mai afioga i le Sui Taitai.

Tofa Hon Lauofo Fonotoe Nuafesili Pierre Lauofo: Faafetai mo le avanoa lau afioga.

E pei ona saunoa foi lou uso a sui usufono mai Anoamaa 1, o tulaga na. E pei o matou nei ua leva ona galulue i le Malo, o lea e malamalama i mea ia e saunoa i ai le Sui Palemia. E pau lava lea o le mea lea ou te fia malamalama i ai, aua o le mea foi lea sa ou popole i ai i le tali a le Malo i le taimi lena, aua e lagalaga ai fesili a le matou Itu, ae o lea ou te le o faalogo atu lava o tau mai le salaries tribunal. Aua o le galuega lea e faatino e salaries tribunal po o le mea ua le toe i ai se tatou salaries traibunal po le remunerations tribunal. Aua o le galuega tonu lena e nafa ma le vaega lena. A o mafuaaga ogaoga e mafua ai review...ou te lagolagoina foi ia review, aua e le iloa pe sii atu ai ma o tatou totogi. A o le mea e ala ai ona ou lagolagoina le tulaga lea, aua e lua lava mafuaaga tetele e mafua ai ona fai le review lea. A lea sa sausaunoa uma lava sui usufono, inflation ma le high cost of living. E le tau faamatalaina o lea tatou te iloa le tulaga o i ai le atunuu. Ma le faaaloalo.

FOFOGA FETALAI: Malo faafetai o lea ua maua, malo foi fesoasoani i lau afioga i le Sui Taitai. Se i tulai mai lau afioga i le Minisita o Faatoaga.

Susuga Hon Laauli Leuatea Polataivao Fosi: Faafetai ou te iloa o le a le toe faasili se leo lau afioga. O lea na tau momoli atu e le Sui Palemia atugaluga ia sa outou saunoa i ai. O lea foi ua maua, ua outou talia le review, a mea o le fatu lena o le tatou mataupu o le review ia outou malamalama ai i le mea lea ua faatulaga e le Malo fou. Afai ua matou omai i totonu o lea e faaletonu, review, review ona malamalama lea. Ae le tuufauina le mea lenei, o le a fufula le aufaigaluega a le Malo, a o matafaioi masani lava. E 20% le paketi a le Malo, salary, e faapefea ona faatulaga. O le ala lea malilie sui usufono, aumai pea le avanoa ona tali lea o le Malo. Pau lava le mea lea na ou tulai atu ai lau Afioga i le Fofoga Fetalai, se o le tausiga ole mamalu o le tatou Fono. Ua uma foi ona fai lau upu ananafi, i le mea lava lea o lou saunoa mai, o lea ua maua o lea ua maua...

Afioga Alaiasa Moefaauouo Malagaitutogiai Sepulona Moananu: Lau afioga i le Fofoga Fetalai...

Susuga Hon Laauli Leuatea Polataivao Fosi: A o le ala lea e vaai atu lava o lea e fai mai lava le mea lea o le le usitaia... o le ala lea o lou tulai atu, malilie sui usufono mamalu,

Afioga Alaiasa Moefaauouo Malagaitutogiai Sepulona Moananu: Saunoaga a le Minisita...

Susuga Hon Laauli Leuatea Polataivao Fosi: Ia o lea e fai mai foi le mea lea o lea e tulai mai lava saunoa.

FOFOGA FETALAI: Onosai mai, se i maea mai le saunoaga a le Minisita.

Afioga Alaiasa Moefaauouo Malagaitutogiai Sepulona Moananu: E leai e le o sao le mea lea ua faalua ona fai, fai mai e 80% lea e alu i le totogi e leai na o le 40%.

Susuga Hon Laauli Leuatea Polataivao Fosi: Lau Afioga i le Fofoga Fetalai, e leai o lau mataupu lea na ou tulai atu ai...

Afioga Alaiasa Moefaauouo Malagaitutogiai Sepulona Moananu: Ua inflate e le aualii ia le fuainumera lea.

Susuga Hon Laauli Leuatea Polataivao Fosi: Ia malie le sui usufono e le i avatua se avanoa e te saunoa ai.

FOFOGA FETALAI: E i ai se taimi ona saunoa atu lea o le Malo faamalamalama lea tulaga

Susuga Hon Laauli Leuatea Polataivao Fosi: Ia malilie o le faigamalo lea ua tulai e faia atua le tonu. A i ai ni outou lagona ona tatou talanoa lea, po o fea o taoto ai le faamaoni o upu na e fai mai. A o le taimi lenei, o lea ua saunoa atu le Sui Palemia, e le saunoa atu i le ea, o faamaumauga ia e aumai i totonu o le Treasury ma mea ia e tutupu, ma fua i a tatou faaiuga fai.

A o le mea lea na ou tulai atu ai lau afioga o le tausiga o le mamalu o le tatou Fono. Ua uma ona e fautua i le Sui Taitai ananafi, a saunoa loa le Fofoga Fetalai, nofo i lalo, faatali se i uma le mataupu, a o lea foi ua toe aliali mai i le taeao lenei. Malie sui usufono mamalu, tau taofiofi mai o lea lava e onosai atu, tau faasolo le tatou galuega, o si au tuualalo lena.

FOFOGA FETALAI: Ia faafetai, ua i ai foi le manatu o le Nofoa.

Afioga Alaiasa Moefaauouo Malagaitutogiai Sepulona Moananu: Lau afioga i le Fofoga Fetalai, e faamalulu atu i lau afioga...

FOFOGA FETALAI: Malie, se i fai atu le tala a le Nofoa, malie mai le sui usufono. O le uiga lava lea, o le tatou felafolafoaiga e faamoemoe i le tofa ma le uta mamao, o tatou uma lava o matai Samoa. e tatau foi ona i ai le tatou feavatai. O le taimi foi o tatou felafolafoaiga aemaise foi o le tausiga o le mamalu o le Maota, o lea e faafogafoga le atunuu. E i ai le manatu, o lea lava e tau tutu atu le Nofoa ina ia tatou o pea i tulaga mamalu ma tulaga masani o le tatou Maota, o la e fia faafogafoga mai si o tatou atunuu i ona taitai o la e sologa manuia le tatou feiloaiga ma le tatou mafutaga. O le mea lea, e aoga foi le fautua mai a le Minisita ia outou afioga.

Ia o le agaga lena o le Nofoa, e le o se tulaga ina ia faailoa le Nofoa ma le tietie atu i luga i i, vaeatu le mamalu o le Maota, o le tausiga lava o le mamalu o le Palemene. O le mea lea ia outou tofa malie, ma tatou...ua i ai foi le manatu o le Nofoa, o le a faaauau le tatou galuega, tatou lauga o totoe, ae faatea ia mea ua tuanai. Se i tulai mai le sui usufono pe i ai se mea....

Afioga Alaiasa Moefaauouo Malagaitutogiai Sepulona Moananu: E avatu lava malu i puega i le finagalo o lau afioga. E leai foi se agaga ia te au, e leai o lea ua faafogafoga mai ia le Minisita, e lagolagoina le review. Ae a saunoa loa i fuainumera ia ma pasene ia e le sao, o le mea lena na fia faasao atu ai lau Afioga. Ne i te i ua aveseina i le faafogafoga a tagata, ae o

lea e lagolagoina le mea lea e saunoa mai ai, o le a fai le review mo le manuia o le aufaigaluega agai i luma. O le matou toe tulai atu lea, faamalulu atu i lau Afioga faapea le afioga i le Minisita. Manuia le fono.

FOFOGA FETALAI: Ou te talitonu o lea ua manino foi lou finagalo, ma o lea e faafogafoga foi le tatou Malo ma le Minisita, atonu o nei lava fuainumera o fuainumera lava ua avane i le Kapeneta. O le ala foi lea ua talanoa mai ai, ae o le a faamautu atili na fuainumera i se taimi.

O le mea lea, o lea ua fou mai le sa o le sui usufono mamalu Maulolo, le sui usufono mo Sagaga 2. Tulai mai le sui usufono mamalu.

Susuga MAULOLO TAVITA AMOSA (Sagaga 2): Faafetai mo le avanoa. Ia se i vavae foi foe. E maea le tatou Fono ananafi i le afiafi, ona ta vaaia lea i tai i papa foi lele i le fati mamafa mai o le galu ma sasa i luga o papa. A o le tele o le galu e sasa i luga o le papa ua atili ai na temeteme mimita le piapia la e siva i lalo, leitioa upu a le atunuu ua tapapa le galu ae temeteme sivasiva le piapia i lenei taeao i le alofa ma le agalelei o le Atua. Sa tofafa ae taumate le ete le po anapo po o le a se foliga vaaia o le alafai mai o le Fonousu a le Palemene i lenei aso. Lea ua muai ave le faasao ma le tatou faaoololomaau i le Atua o Malo i lau afioga i le Fofoga Fetalai e ala i le talosaga. Ua maea foi ona faatulima lau afioga i le Fofoga Fetalai i le paia o Samoa o lo o tapuaia faiva o le Maota lenei aemaise foi sui mamalu o itumalo e 51.

Na o si au upu laititi lava e fono faapipii ai i lea tulaga. Ia, alo maia la outou tapuaiga Samoa aemaise foi lou itumalo le afoaga o Malie, Afega ma Tuanai se i taumafai atu so tatou sao.

Le aufaigaluega a le Atua aemaise foi le mamalu o lo o afifio nei i le Maota i lenei aso ae faapitoaugafa se upu atonu o faafogafoga mai le Afioga i le Tamaitai Palemia. E faatalofa i ai i sailigamatagi ma nisi foi o le Kapeneta. O le tatalo a lenei sui usufono ia maua se avanoa e pai atu ai le mana faamalolo o le Atua e ala i fomai, vave maua se avanoa e toe faafoisia le malosia, foi mai ma tatou mafuta.

O le mataupu i le aso, sa lona tolu i lau lisi, e fa nai mataupu ia le vaega lea o tagata faigaluega a le Malo ae pe manaia loa le soosoo atu i le finagalo o le afioga i le Sui Palemia. Faafetai ou te ioe ma Amene. Faafetai i le mea ua faamanino mai, pau lava lea o si vala laititi lea e fia fesoasoani atu ai, ona o lea e le o maoti mai se tulaga o le time frame lea ua taofi ai avanoa ia ona o le tuualalo i lau afioga i le Sui Palemia, Minisita o le PSC, ua uma ona taoto i paga faataatiaga o le pathway for the development of Samoa. O i ina la le autu o lea e mamanu mai ai strategic plans a Matagluega uma e 15 a le Malo. Ua taele matamaga foi ma matavai le latou fatuaiga tausii. O le poplega lea e i ai, afai nei ae umi se taimi o taofi avanoa ia o longa uiga e iai nisi o le a overload, e foliga mai o ACEO. Ia

ua tatou iloa uma lava, a overload loa se isi e ono aafia ai lana performance quality. Pei o le popolega lena, ona tatou toe tusitusilima foi lea i le aufaigaluega. A silasila i latou annual reports ia e aumai, ou faitau ai o le tele o luitau la e aumai, o le tulaga o tagata faigaluega ma e ono afaina ai foi le latou capacity ae mafai ona ausia goals and objectives ua uma ona mamamu ma faataatia e Matagaluega. E pei e pau lena o si vala lea e faataatia atu i ou tafatafa ae faafetai mo le review. A mafai ona tatala pea le avanoa faagaioi le review ae tatala le avanoa ia aua nei poloka tulaga o le ausia o mea ua uma ona faataatia ia ma afaina ai foi fuafuaga a lo tatou Malo ua uma ona faataatia i lalo o le Pathway for the development of Samoa, pei e pau lea o si vala e tuu atu i tafatafa.

Se i fai lava ma faaitaiga lou vaai atu i le annual report a le vaega lea o le Soifua Maloloina ia e moni ai le saunoga a le sui lea le sui usufono mai Safotu lea faatoa maea atu nei. O le popolega la lea e i ai pe mafai ona tau faamatagataga teisi lava le aufaigaluega a le Soifua Maloloina, research lea sa saunoa ai le Sui Palemia. A outou silasila i le latest puletin a le WHO o le 22 Ianuari a Tesema talu ai se i oo mai le 8 Ianuari 2023 masina lenei ua toe siitia i luga o 10% e ua toe maua i le faamai o le Koviti vaega lea o le Omicron. A o le mea la matautia, tusa e 49,000 e ua maliliu i le piriota lea tusa lea ma le 22% ua siitia ai e maliliu mai le aso 22 Tesema 2022 e oo i le aso 08 Ianuari 2023, I'm talking about research. O le uiga la o le faamatalaga lea ua tatala borders, faafetai i le Malo e toatele e na malaga mai, manaia ma matagofie a o le popolega, pe fia nai faamai lea ua aumai. E i ai le taimi e ono tupu mai ae aoga lo tatou matau o fuainumera nei e fesoasoani i a tatou tapenaga nei mea ua tupu mai se mea a o lea tatou te nofo tapena. O le tatou vaa ma le tatou galuega e fautele, matou te tuualalo atu ma le agaga maualalo a o loo i ina le tofa ma la outou pule faasoa.

O le matou itumalo, ona o lea sa taua e lo'u uso a sui usufono mai Sagaga Nu.3 le falemai lea o Afega. Lau afioga i le Minisita o Falemai e auala atu i le afioga i le Fofoga Fetalai sa ou taua talu ai e tasi a si aiga la e toalia ai le fanua lea pe 4 i le 5 eka ona fai ai lea o le falemai. O le vaiaso talu ai la e faafofoga mai matai o le aiga lea. Faafetai. Na matou feiloai i le vaiaso talu ma nisi foi o tamalii o le nuu nei ma o la e ua i ai se fuafuaga a le la itu o le aiga o le a tatala le latou faalavelave ae faamatuu mai le fanua aua le falemai o le itumalo o Sagaga. E 5 itumalo lea e agai ai le auunaga a le falemai lea, o le mea lea pei ua ou vave taua lea tulaga, e seki mai loa le tulaga i le mea lea ua tatala ia noanoaga ia ona ou oo atu loa lea e vaai lau afioga i le Minisita o le Falemai. O le mea sili ua matau atu ua toe faafoisia atoa lou malosi e feagai ma le mamafa o le galuega lea o fufou mai foi i tulaga lava nei i faamai i le lalolagi ua aafia ai ma Samoa.

O le tulaga i le Matagaluega o Aoga. Na ona ou toe tuualalo ma faamanatu atu i lau afioga i le Minisita e le o se mataupu fou sa ou laga muamua. E 4 sui ia sa talanoa ananafi i le mea lea o le abuse o le social

media o le mataupu tonu lava lea sa ou taua. Faafetai. Ua matauina le lagolago malosi o polokalame a le Matagaluega o Aoga i mea tau TVET a o le tulaga la lea toe faamanatu atu pe maua lava se fesoasoani mo le IT Laboratory a le Tausaga 8 mo le aoga i Malie, Tuanai ma Afega e fesoasoani tele aua afai ae toe sau se isi outbreak faapenei o le mea a lea tasi e toe foi ai foi tatou o le tulaga o le taofi o fanau i fale ma fai mai i ina a latou aoga.

I le tala foi i vaifanua anapo, ma le taeao nei ua matua pau maualalo le resitala o tamaiti i le Iunivesite Aoao o Samoa. A o le mea la e sili ai ona paso le mafaufau a fua atu i le lesitala lea ua iai ua 38% tusa ua 40% ua faaitiitia ai ua taugofie ai le lesitala i le tausaga nei nai lo le tausaga talu ai. E momoli la'u faamalo i le Pulega o le Iunivesite Aoao o Samoa i le faamamaavega ae pe aisea lava ua ala ai ona matua pau maualalo ma faaitiitia tamaiti e resitala i le Iunivesite a o lea ua pau maualalo le resitala? O le popolega e aafia foi ia tupe e faagaioi ai le tatou Iunivesite. Atonu tasi lea mea e tuualalo atu ai i lau afioga se i silasila i ai po o lea le mea lea e tupu po o le mea malosi aua na ona uma lava ona sau i le news i le taeao nei ae sosoo mai ma le faalauiloa a le vaega lea o le USP sau le atoa le faiga o latou lesitala po o le mea ua malosi le promotion a le USP ua taenai atu ai ma tatou fanau ia ae tau faaletonu ai tatou. Ia ole tatou vaa e fautele poo la'u upu sa fai atu nei e tuualalo atu pea i tulaga ia e te seu silasila i ai. Sa ou taua foi ma ou toe faamanatu atu lava e aoga tele le social media ae a mafai ona silasila i ai le Matagaluega o Aoga e pei ona ou taua muamua i se tulaga e faaoga ai, aoao ai le fanau aoga aemaise na faatoa tatala la outou culture center, manaia lava i le faaiuga o le tausaga talu ai amata ona aoao a tatou fanau i le faaogaina o facebook ma mea faapea i polokalame e faasino tau aoaoga ina ia aveia ia fesootaiga televavave i luga o upega fesootai internet ma upega tafailagi website e aveia ma ofaga malu e fiafia e o i ai le fanau aemaise le atunuu maua mai ai tala o le tatou vavau, tala o le tatou faasinomaga e atili mitamita ai le Samoa o ia o le Samoa a o le galuega a le Matagaluega o Aoga. Faafetai. A o se tuualalo lena lea e avatu i ai.

O le vaega lea i le tau o le soifuaga ona lea faapea e leai ni mafuaaga. A silasila lau afioga i le Fofoga Fetalai, o le Lipoti lea na aumai le Central i le third quarter o le tausaga talu ai e 11% le inflation, 11% fai a si maualuga. Ia, e le toe umi sau tala i lea mea e le o se mafuaaga lelei lena. O le mea foi lea tau o le soifuaga e le o se mea a le Malo. E manino lelei le aafiaga ua i ai le lalolagi aemaise lava suiga o le tau. Ua tatou vaai foi i tala mai nuu mamalo ia la ua declare le tulaga foi lea o le state of emergency i California i lologa ma mea faapena, o mo mea o afa mafuie aua e le alofia e afaina ai foi Samoa. O le uiga la o le tau o le soifuaga la lea e tele a mea ou te le fiafia ai lau afioga i le Fofoga Fetalai Minisita o Faatoaga ae oo loa le mea lea tau o le soifuaga o lo'u fiafia ia lana pese lea fai soo pau a lea o

le fofu atiae o tatou aiga, atiae o tatou laufanua faaitiitia le tatou faalagolago i le tau o oloa mai fafo. O lea la ua matau atu e pei e foliga mai o le tou fuafuaga a le Malo aumai muamua le \$200 se i vaai poo lelei ona faaoga ia e i ai foi le taua o lena mea. Lea foi la ua aumai le isi \$150 a o e o loo taofia se alofa ia, ioe, tatala i ai le avanoa atonu o se isi mea e toe sau na ua i ai tulaga e aua nei toe faaletonu. O lea foi la ua matua manino le mata o le vai i le saunoaga foi a le Malo e le i aumai ni tupe e tufa na aumai e faasoasoa tatau ina ia toe fua mai i ona lava fua le miliona lea ina ia faateleina aua le agai luma o Samoa.

Na pau a lea o le mea lea la ua maea le 200 na faaoga a lenei itumalo, faafetai. Faafetai foi mo le isi vaega e 150 a o le taimi e tatala mai loa le atoaga o le miliona ona tatou maua lea o le mea lea saunoa mai ai le Minisita o Faatoaga. A ta vaai i le tele o saofai ma faalavelave na fai nei, pusa elegi ma pusa pisupo ua seasea ona toe vaai i ni puua lapopoa sa i ai. A o le taimi lava tou te faatau ai le oloa lena, o le taimi ua alu tatou tupe i fafo i imports ua atili ai le tele o le trade deficit ma faaletonu ma taugata ai le tau o le soifuaga a tatou, Taumafai e faalagolago i a tatou meatoto ma meafafaga mea lea na matou vave pipii i ai le itumalo lenei ina ua aumai le fuafuaga lea i le miliona, decentralized resources, ave i tua i afioaga ma atili lelei ai le galulue faapaaga a alii ma faipule ma le malo tutotonu. E pei o le mea o lo o i ai ia local governments i Fiti ma Niu Sila manatu o se ata lena lea ua ou vaai atu ua ataata mai i tulaga o le fuafuaga lea ua i ai nei. E le o se mea leaga o le mea lelei ae aua foi nei galo so o se mea fou ma se faamaite fou e tele foi le masalosalo tele le faitio. Na pau a o lea, ia lavapapale ma onosai mai lena itu o le malo. Ia e pei o nai mea na sa fia soso atu ai ona ua na o se Tala Faatatau Faaopopo o le Tupe ae aoga foi lea e faamaite atu ai mo le agai luma e le o toe mamao foi e toe tapena le tatou Tala Autu o le Tupe. O se soso atu lea ae toe faamanatu atu lava lau afioga i le Minisita o le Falemai toeititi a ou oo atu loa ua ok le fanua e fai ai le falemai a le itumalo aemaise lau afioga i le Minisita o Aoga e auala atu i le Nofoa i tulaga ia o IT Laboratories a lenei Matagaluega. Ia manuia le tatou Fono, manuia le tapuaiga a Samoa. Lau afioga i le Fofoga Fetalai e nao na matou, pei o isi taimi pei ua tau oso lou fiva maualuga i le Sui Taitai o le matou Itu ae e manaia ia o si upu lea na ou tau ane ai le Faitau Aso i le Aso Toonai lea na tea atu nei, o le upu i le pese a Solomona. O lea foi la ou te tuu atu i tafatafa, e manatu o le a le toe i ai se isi e tatatuli pe fafagu ia te oe le pele, faitalia oe nei mea ua sola le sevi ma le aila i le vao. O le uiga o le faamatalaga, e leai se isi e toe faalavelave se o nai mea lava tatou te totoo ai, a o lena e i ina le tofa.

Ia manuteleina lau tapuaiga Samoa ma le aufaigaluega a le Atua aemaise lo'u itumalo. Manuia le Fonousu a le tatou Palemene. Soifua ma ia manuia.

FOFOGA FETALAI: Malo faafetai saunoa i lau afioga i le sui usufono mamalu mai Sagaga Nu 2. Malo a le saunoa ma lou sao foi atonu o lea foi ua faalogologo atu foi ma faafogafoga atu le tatou Malo ma le Kapeneta aemaise foi le Maota. Manaia foi lau agiagi faaso mai i lenei taeao ia malo faafetai. E aoga foi e sui ai foi le faafofoga ma le faafogafogaaga a le Maota mo le tatou galuega. O le mea lea malo faafetai a o le Sui Taitai, ia atonu o lea ua silafia e le Sui Taitai le agaga o le Nofoa lea foi ua fesoasoani atu i ai. O le mea lea atonu o lea ua tatou galulue faatasi aua lava le manuia o le tatou Maota aemaise foi le tatou usugafono. Ia se i tulai mai lau afioga i le Sui Taitai.

Tofa Hon Lauofo Fonotoe Nuafesili Pierre Lauofo: Ia, e pei lava o lea na e maua i lenei taeao lea lava ua ou faanoi atu a i lau afioga pe a ou tulai i luga, ioe. So o se taimi a o le a ou faanoi pea. Ae pei a ona saunoa le sui o Sagaga le Tofa a Maulolo, [.....] leaga o lea e matau atu ua 1, 2, 3, 4, 5 Minisita la e siigasegase ina ne i te i foi ua sii gasegase ma lau afioga ae matau atu ua ta le taimi o le tatou malologa. Faafetai lau afioga.

FOFOGA FETALAI: Malo. O le taua lava o nei mea o le tatou felagolagomai i mea mamalu ma mea matagofie aemaise o le tauleleia o le tatou Fonousu. O le mea lea faafetai lau afioga i le Sui Taitai ua e logosaia se upu a le Nofoa.

Ia se i tulai mai lau afioga i le Minisita o le Soifua Maloloina.

Afioga Valasi Luapitofanua Toogamaga Tafito Selesele: Sa ou manatu e faaauau le tali manaia i le Sui Taitai, peitai, e foliga mai i nauna o lana saunoaga e amuamu i siigamai a Minisita ma le Palemia. E foliga o upu ia e aumai e molemole i le faalogologo ae o totonu o lo o tapuai ia vave ona uma Minisita.

Lau afioga i le Sui Taitai soia ia e te faapena faamama lou loto tatalo i le Atua aua e le iloa poo le vaiaso lea sii sou gasegase. E faapena aua nei tatou matea minute ma sekone o le... ia ona avatu foi lea o le pepa e faamolemole atu ae aua te toe amuamu i siigagasegase a le Palemia aemaise foi o lea foi faatoa foi mai nisi o lenei Itu na faamolemole atu foi. Ae faafetai lau afioga.

FOFOGA FETALAI: Ia se i tulai mai.

Tofa Hon Lauofo Fonotoe Nuafesili Pierre Lauofo: E leai e faamalulu atu e le o se faamuamu e faamalulu atu.

FOFOGA FETALAI: A o le a la se mea e teu ai lau saunoaga lea ua....

Tofa Hon Laufo Fonotoe Nuafesili Pierre Laufo: O lea ou te... e mafua ona ou tulai atu ona o le saunoaga o le sui usufono lea na maea nei, ae le faapea o... O lea tatou te tatalo uma ina ia manuia le saligamatagi a afioga i Minisita. O le tatalo lena lea e i ai o se aso muamua tatou toe feiloai ma tatou talitalie ae faafetai lau afioga i le Minisita o le Soifua Maloloina o lena ua aumai lau ioega, ae i ai se taimi lau saina lena faamolemole.

FOFOGA FETALAI: Faafetai malo lava. O le mea sili ona taua, ia lea ua saunoa le Sui Taitai o lea e sau mai lona loto talosia mea lea faafetai. Ia lau afioga i le Minisita o Faatoaga.

Susuga Hon Laauli Leuatea Polataivao Fosi: O si upu laititi a lea ona ua fesiligia le malosia o lou fatu ? Lea na saunoa i ai, e tatau ona aveese ia upu o na e 100% lou fatu lau afioga.

FOFOGA FETALAI: Oi o a'u lea na faatatau mai ai?

Susuga Hon Laauli Leuatea Polataivao Fosi: Ia o lau afioga lea na faatatau mai ai.

FOFOGA FETALAI: Ia ou te faamanino atu lau afioga i le Sui Taitai, tailo a i se fatu pe tutusa ma le fatu o le Fofoga Fetali malosia ia manuia ile alofa o le Atua. O le mea lea, ia aveese lena upu lau Susuga i le Failautusi.

Upu na faatonuina e le Fofoga Fetali e aveese mai faamaumauga o le saunoaga a le Sui Taitai o le Itu Agai... “[*leai e alofa atu i lou fatu*]”.

Na faataatiaese Taulumaga a le Fono Aoaio Faitulafono mo lana malologa masani i le itula e 10:46 i le taeao ma toe faaauau i le itula e 11:25 i le taeao.

Na toe faaauau felafolafoaiga i luga o le Tulafono Tau Faaofi o le Faatatauina o Tupe Faaopoopo (Nu.1) 2022/2023.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaio Faitulafono.

E i ai le manatu ua maua se faasiligamalosia ina ua matu i fau le tautega ma le taligasua a le paia o le Palemene. Tatou te faafetaia lava le Atua i Lana

foai ua avagalimaina i ai le tapenaga a le tatou Ofisa. O le mea lea, malo faafetai.

E faataatiaese a tatou Tualumaga mo le malologa ua maea saunoa le sui usufono mo Sagaga 2. Ia, o le avanoa leni mo se isi sui usufono mamalu e fia saunoa.

Afioga Fepuleai Faasavalu Faimata Sua (Salega 1): Lau Afioga i le Fofoga Fetalai pe maua se avanoa?

FOFOGA FETALAI: Ua maea ona e saunoa i le aso ananafi.

Afioga Fepuleai Faasavalu Faimata Sua: E i ai si vaega lea faamolemole lau Afioga i le Fofoga Fetalai pe...

FOFOGA FETALAI: Ia se i saunoa mai po o le a lena...

Afioga Fepuleai Faasavalu Faimata Sua: Faafetai mo le avanoa. E leai se agaga e toe tulai e fai se manatu faaopoopo, ae tusa ai ma le tatou malologa i leni aso, ua saoi le taligasua ma le taumafataga i lau Afioga ma le mamalu o le usugafono.

Ae ua ou tulai ona ua maitauina foi e leni itumalo ma leni sui usufono se saunoaga foi a se sui usufono sa faalele foi ma faapea ona saunoa i ai i le taimi ua fano e agai i le saunoaga a le Afioga i le Sui Palemia, le sui usufono lea mo Vaimauga 1, lea sa i ai se saunoaga faapea, tulou, ou te vaai foi i le la Itu, e le o matou ni manu o ni manatu faaletagata pe le o matou ni manu, tulou.

Ia ou te tulai atu e talosaga atu i lau Afioga pe mafai ona faataatiaese nei lafoga ona e aafia uma ai sui usufono o le Maota i lafoga ia pe a faalatele, aveese lafoga ia mai faamauga a le Maota, e le o matou ni manu, tulou. Faafetai.

FOFOGA FETALAI: Ua faaluaina le sui usufono mo Salega 1. O lea ua faafofoga atu le Failautusi, o lea o le a tuueseina. Faafetai mo le fautuaga.

Ia, tulai maia lau Afioga i le sui usufono mamalu mo Gagaifomauga 2.

Tofa FOISALA LILO TUU IOANE (Gagaifomauga 2): Ia, ae le i faia se lagona o leni itumalo aua leni aso ma le faamoemoe, ae tainane foi o le Tala Faatatau o le Tupe, e muamua ona ou faatalofa atu i lau Afioga a le Fofoga Fetalai, ae tainane foi o leni Palemene mamalu i ona tulaga faalupe. Ona matou manatu lea, o lea ua mapu i tialologo le faalelegafulu a le manuula aua leni aso ma le faamoemoe, ua uma foi ona fola le fala aua e na faasausau i totonu o leni Maota. Ae a tuanai lea atuvasa ma lea

atuvasa, ona taoto lea o le tai i le taitafola ma tailomaloma. Sa taitoalua ma lau Afioga i le Fofoga Fetalai e ala i talosaga molia i le taeao ua sola.

Ae tau ia ina ou faatalofa atu ma faamanuia atu le tausaga fou i lau Afioga i Le Ao Mamalu o le Malo o Samoa ma lau Masiofo. E faatalofa atu foi ma faamanuia atu le tausaga fou i lau Afioga i le Sui o le Fono a Sui Tofia ma lou faletua.

E faatalofa atu foi i lau Afioga i le Faamasino Sili ma le Ofisa o Faamasinoga. E faatalofa atu foi i lau Afioga i le Sui Palemia, alii ma tamaitai o le Kapeneta, ia ae tainane foi le saofaiga a Minisita Lagolago ma lenei Itu. A lele ua faafeagai segaula i le afio o lau Afioga i le Sui Taitai o le Itu Agai ma sui usufono mamalu uma o lena Itu i lenei vaega o le aso.

E le faagaloina foi Ofisa Sili o Pulega o Matagaluega i la outou galuega fai, ae tainane o Faauluuluga o Pisinisi Tumaoti a lo tatou atunuu, o outou o lo o vae ma lima i ai le Malo aua tatou galuega fai.

E le faagaloina foi le tapuaiga a Samoa i Tama ma o latou Aiga, le usoga a Tumua ma Pule, Ituaa ma Alataua, Aiga i le Tai ma le Vaa o Fonoti.

E faatalofa atu i le talasa, le aufaigaluega totofi a le Atua o lo o talafaauto i afioaga ma alaalfaga ma itumalo aua le tauasuina o le ipuvai o le ola aua Samoa mo nei ma a taeao.

E le faagaloina foi le faigamalo a Tutuila ma Manua, i le afio o lau Afioga i le alii Kovana, le Sui Kovana, le Fofoga Fetalai o le Maota ma le faigamalo. O le paia lava lea aua Fatulegae ma le Malotumau. O Laloifi, Falesau ma Gagamoe ma Utumoe. O paia na o le Faleagafulu tainane le paia o le Tootoo ma le Manuatele. O paia na o Samoa e amata mai i Poumasame seia paia Fili ma Puletuu.

Ona matou manatu lea i lenei vaega o le taeao, lau Afioga i le Fofoga Fetalai, e faatalofa atu foi i si ou itumao pele o Gagaifomauga 2, e amata mai i Malaesa i Paia seia paia le afioaga i Fatuvalu. O outou sa ma faigata, o paia, e le toe oo i ai se faamatalaga a lo outou sui usufono. E leai o paia lava e tumau seia oo i le faavavau. E leai se isi e mafai ona toe autalaina, faaopoopo pe toe toese se iota. O paia i le aufaigaluega totofi a le Atua i lo tatou itumalo, malo tatalo, malo tapuai, e afua ai ona aemalo faiva o le auauna.

Ae ua matou manatu lau Afioga i le Fofoga Fetalai i lenei vaega o le taeao, ia o le a pai ia i le si'a o le Tuiatua aua le tulai atu o lenei sui usufono i ni nai vaivaiga foi ma ni nai manaoga foi o lenei itumalo a o se faafofoga foi a le Palemene.

E manatu lau Afioga i le Minisita e tusa ai ma le faamoemoe ua i luma nei o le Palemene, ia e le o se Tala o se Tupe tele. Ae tau ia o ni lagona vaivai aua lenei aso ma le faasologa o le tatou mafutaga.

Ia lau Afioga i le Minisita o le Siosiomaga ma Punaoa Faalenatura, ia, e tuu atu lava i ou tafatafa. O lenei itumalo e lalata nai isi ona afioaga i le matafaga se i tulou le Maota nei. A oo ina siisii le tai, e le tau faailoina lea

vaega. E i ai nisi o nai nuu o lenei itumalo i lalo ua uma ona maea a latou taligalu, a o nai isi nuu, e oo mai i le taimi lenei ua matua malepelepe lava i le galu. O le mea lea e tuu atu ai i ou tafatafa si o matou nuu i Fatuvalu ma se vaega o Matavai, o nuu ia lau Afioga i le Minisita e manaomia le toe faaleleia o nai vaega ia. Pe lava lau faasoa pe le lava, ae tau lava ina tuu atu i ou tafatafa.

Ia, o eleele o le matou nuu ma lo matou itumalo lea sa agia i le faataamilosaga foi a le Vaega Faaupufai, ua matou manatu ua le toe faaaogaina, le mea lea sa i ai le Uesetete, i gauta tonu lava o le nuu lea o Lefagaoalii. Ua ova nei ma le 20 tausaga e le o toe faaaogaina. Atonu foi na agiga i se tatalo a le sui usufono o lenei itumalo ua valaau i ai le Atua, a fa au ae toe faamatuu mai nai vaega ia e galulue ai lenei itumalo, aua se lumanai manuia o Samoa ma lenei itumalo. O le tatalo lea e tuu atu i tafatafa o lau Afioga i le Minisita.

Ona matou oo mai lea i lau Afioga i le Minisita o le Soifua Maloloina. O ou apaau alofa ma ou apaau agalelei matou te malu ai ma le afioga i le Tama Matua ia Tea. Faafetai i le Atua o lea ua maua le tatou mafutaga ma le afioga i le Laau na Fausia e lagolagosua aua le galuega, ae matou te talitonu i le falemai i nisi o sui usufono ua uma ona laugaina, e leai sa matou faamatalaga tele e tuuina atu taunuu se aso o le tatou faamoemoe aua le tatou asiasiga, ia, ona tuu atu lea o se manaoga auipito sili ona taua o le falemai a Safotu se i silasila i ai lau Afioga.

Ia, ona ou oo mai lea i lau Afioga i le Minisita o Galuega Tetele a le tatou Malo, lau Afioga Olo Fiti Vaai. Ou te tulai atu ma lou ava ma lou faaaloalo tele, e i ai auala a lou itumalo ua matua leaga faia lava i le taimi lenei. O le Paeaiga talu ai a o tauavameaina le faamoemoe, na avatu ai masini faatutu i Matavai, le nuu lea o Matavai, sa sua faatasi ma le auala i Paia. Paga lea, na toe aveese faafuasei mai masini, ou te le iloa po o le a le mafuaaga ae le i suaina le auala i Matavai, ae sua na o le auala o le matou pitonuu i uta i Paia.

O le tatalo a le sui usufono o lenei itumalo, ni a fa au i se asiasiga a lau Afioga, o le matua ova ma se 200 tagata o lo o nonofo i uta i ina. Ou te iloa le mafuaaga na ala ai ona toe aveese masini, ia leaga ua tuanai lea atuvasa, e le toe fia oo i ai se faamatalaga a le sui usufono lenei. A o le tatalo i lau Afioga i le Minisita, e ova ma le toa-200 tagata ia e nonofo i uta i i isi ou nuu lea o Matavai.

O si ou nuu o Paia, ia e le toe tau fesiligia lea vaega, e alu atu lava i tai i le mea e i ai le auala autu e tau i uta i le mea e i ai le ana o le au pupuu, ia, ua matua faaletonu lava le auala. Tau lava ina tuu atu i autafa o lau Afioga.

Tofa Hon Olo Fiti Afoa Vaai (Minisita mo Galuega, Felauaiga ma Atinae Eese): Lau Afioga i le Fofoga Fetalai...

FOFOGA FETALAI: Ia, malie le sui usufono se i tuu atu le avanoa i le Afioga i le Minisita mo Galuega Tetele.

Tofa Hon Olo Fiti Afoa Vaai: Faafetai atu i le afioga i le sui usufono mamalu i le mataupu lea. E leai ma se sese o le saunoaga a le sui usufono mamalu. Ae sao ai, ua mavae atu lena atuvasa i le taimi ae le i faia le tatou palota, e tutusa lelei lava taua. Na oo atu foi masini i o i Salega, e le i umi lava ae toe aumai. Ou te iloa o lena ua e silafia, e sao lau saunoaga na e te silafia lelei lava le mea na toe aumai ai. O le taimi lenei i le tatou faigamalo lea lau Afioga i le sui usufono mamalu, e le toe i ai ni na mea o le ave o masini toe aumai. A vaai atu loa ua tau faiaina le sui usufono ua toe aumai le masini e le sua le auala. O lea ou te iloa atu le mea lena e te saunoa mai ai. Ia e le faia e le tatou faigamalo se mea faapena. Ma le faaaloalo.

FOFOGA FETALAI: Faaauau mai le saunoaga a le sui usufono mamalu.

Tofa FOISALA LILO TUU IOANE: Ia, faafetai i le tali malamalama a lau Afioga i le Minisita. E le toe taea i se faamatalaga lea mea, tuusao i luma so matou vaivai.

O le auala a si o matou nuu lea i Paia pei ona tau faalogologo atu e amata atu i tai i i i Samauga, e i ai foi le vaitaimi e afio atu ai lau Afioga...

Afioga Hon Lautafi Fio Selafi Purcell (Satupaitea): Lau Afioga i le Fofoga Fetalai pe maua se avanoa.

FOFOGA FETALAI: O ai e te faauilavea i ai Satupaitea faamolemole?

Afioga Hon Lautafi Fio Selafi Purcell: O se mea e fia faasao lau Afioga.

FOFOGA FETALAI: I le saunoaga a ai?

Afioga Hon Lautafi Fio Selafi Purcell: Saunoaga a le Minisita. Saunoaga a le sui usufono.

FOFOGA FETALAI: O oe foi o se tasi o sui usufono matua.

Tofa Hon Olo Fiti Afoa Vaai: Lau Afioga i le Fofoga Fetalai, o la e soli le Tulafono le sui usufono mamalu.

Afioga Hon Lautafi Fio Selafi Purcell: O lea e faau atu i lau Afioga o oe e pule i le Maota lenei i lalo o tatou Tulafono Tumau.

FOFOGA FETALAI: E le avea foi le pule o le Maota e faisee ai tatou mea.

Malie oe le sui usufono mamalu, agai i o ia Foisala lau faauilavea lea ua ou faataga atua.

Afioga Hon Lautafi Fio Selafi Purcell: Faafetai, leaga o la e sao lelei le saunoaga a le sui usufono. Ae ala ona pei ua faaluafesasi le saunoaga a le sui usufono, o lea foi ua tei ua toso atu i ai le palota e le Minisita, fai mai a latalata loa i le palota aveese le masini, e vaai atu loa ua tau faaletonu le sui usufono aveese le masini. O la e foi e silafia lava e le sui usufono ua tulai mai, atonu o le aveese o masini lea na tulai mai ai. Ia ma lou faaaloalo. Faafetai.

Tofa Hon Olo Fiti Afoa Vaai: Lau Afioga i le Fofoga Fetalai, e sili la le tatou fesili uma lava i le sui usufono, se faamolemole lau Afioga i le sui usufono mamalu, o anafea na tulai mai ai le mataupu lea e te saunoa i ai?

FOFOGA FETALAI: Ia, faasaosao lelei lou finagalo ina ia sao le mataupu a lou itumalo. Saunoa mai.

Tofa FOISALA LILO TUU IOANE: Toeitiiti lava uma lou taimi lau Afioga i le faalavelave soo o sui usufono, ae se i ou tali atu ia ia Satupaitea, e tusa ai foi ma le faafesili ae tainane foi le Afioga i le Minisita. O le mea lava lea na ou fai atu ai ou te le fia tali i le vaega lea.

O le taimi tonu lava ua sauni Vaele Iona e alu i le FAST, na avatu ai masini ia e sua ai le auala i Paia ma le auala i Matavai. Na iloa loa e le faigamalo ua tuanai atu e alu Vaele i le Vaega Faaupufai lenei, aveese filemu lava masini ma Matavai. O le ala lea.

Tofa Hon Olo Fiti Afoa Vaai: Lau Afioga ua manino, faafetai lava i lau Afioga i le sui usufono mamalu.

FOFOGA FETALAI: Ia, o lea la ua... A e alofa le sui usufono mamalu, see ese loa mai lena vaega ae faaauau lau saunoaga.

Tofa FOISALA LILO TUU IOANE: O lea o le a faaauau le ...

Afioga Hon Lautafi Fio Selafi Purcell: Lau Afioga i le Fofoga Fetalai faamolemole.

FOFOGA FETALAI: Se i onosai mai lava le sui usufono mamalu leaga o lea ua toe tulai mai le sui usufono mo Satupaitea.

Afioga Hon Lautafi Fio Selafi Purcell: O lo o manino lava i tualumaga o tatou Fonotaga, o mea e aumai totonu o le Maota lenei, o mea e faamaonia, o mea o lo o i ai evidence. E mafai ona fai atu e aumai ona aumai lea. E le aumaia ni masalosaloga, e le aumaia foi ni tala alatua. Tusa po o le a lava le faalogo atu e moni i lana ia faauigaina, a oo mai loa i totonu o le Maota lenei, ona aumai lea o mea ua faamaonia e tapa e le Maota, aumai evidence ona aumai lea.

E pei o la e saunoa mai le sui usufono, na oo loa i le taimi lena, ae leai ni faamaumauga o mafuaaga tonu ia. O lona ia lava lea masalosaloga, masalosalo atu ai ma le Afioga i le Minisita, e leai ni faamaumauga o i ai se pepa na sainsi atu ai le faigamalo e toe aveese masini na, ona o le sui le la e alu o le sui e palota i le FAST. O mea mama lau Afioga lea e taumafai atu ai. Ma lou faaaloalo.

FOFOGA FETALAI: Se i tulai mai lau Afioga i le Minisita.

Tofa Hon Olo Fiti Afoa Vaai: Faafetai. O lea o le a toso tele lava i tua le tatou mataupu, a o le mataupu lea e saunoa i ai le sui usufono mamalu o Gagaifomauga 2, na tupu foi ia te au, na i ai foi le tulaga o le tau avatuga o masini i o ina ua tau i ai le mea foi lele o le a toe fai le faiga palota o le a toe faataape le Palemene ae toe fai le faiga palota i a tatou fevesiaiga ia na fai. Ia, ou te faamalulu atu i le Afioga i le sui usufono mamalu, e le mafai ona aumai se masini i totonu o le Maota lenei, tulou. E tele tele lena mea, a o le evidence lena e aumai.

Afioga Hon Lautafi Fio Selafi Purcell: Lau Afioga i le Fofoga Fetalai...

FOFOGA FETALAI: Ou te iloa o lea ua maua le finagalo o lau Afioga i le sui usufono mamalu Satupaitea.

O le fautuaga foi a le Nofoa i lau Afioga i le sui usufono mamalu, ia tatou faasee ese ma lea tulaga ona e i ai foi nisi tulaga i tua atu o lenei mataupu pe a toe aumai i totonu o le tatou Maota, a o lea ua manino, faaauau pea lau saunoaga aua le manuia o le itumalo.

Tulai mai le sui usufono mamalu.

Tofa FOISALA LILO TUU IOANE: Lau afioga i le Fofoga Fetalai, e faamalulu atu foi i le sui usufono pe afai ua paopapa se faamatalaga i la outou faafofoga.

Lau Afioga i le Minisita o Galuega, o lagona o lenei itumalo. O le talosaga mulimuli a le auauna o tulai atu nei, o si o matou afioaga i Lefagaoalii. Atonu o lena ua e silafia, o le nuu atoa lava ua i uta, e leai ma

se isi o toe i lalo ona o fuafuaga a le Silisili Ese. Ae talosagaina auala. Afai e a fa au le finagalo o lau Afioga, tau ia ina sua faalamolemole, se i faata i se isi masina pe a tele se Tala o le Tupe a lau Matagaluega. Ae a faalamolemole, ua lava lea.

Lau afioga i le Minisita e tauala atu ai so matou vaivai, o lo o ou nofo nei i Vaitele Fou, a o le upu lava sa ou faalogologo mai ai i fafo, o le mea e lelei i Apia nei, e lelei foi mo Savaii. A ou alu ou te fia malaga i Savaii, ona ou oso lea i le itulagi lea i Aleisa, ona tau lea i Leulumoega faatifa atu ai i Mulifanua. A silasila lau Afioga i le ogaauala lea, pe 5 pe 6 ala kolosi o lo o i ai i ina, e tau uma lava i le auala lea i Aleisa, tau i le auala lea e tau i tai i Leulumoega.

O le tatalo a le sui usufono o lenei itumalo, lo tatou motu i Salafai, na o le tasi lava le auala kolosi la e i ai, e alu atu i i Fusi Safotulafai, tau i Patamea. Ni a fa au le finagalo o lau Afioga ae fai se isi auala kolosi e oso atu i Lefagaalii e tau i Palauli, oso se isi auala kolosi i Sasina e tau i lou afoaga o Sagone, o le tuualalo lena a lenei sui usufono. A le o lenei Paeaiga a o se isi Paeaiga, leaga a ou tilotilo i le itulagi lea, ou te le taua atu alaafaga e tau o latou auala i totonu o le mea lea. Aua o le agaga lava lea, afai e lelei i Apia nei, e tatau foi ona lelei i Savaii. A o nai auala kolosi na e lua e tau mai le Itu o Tane e tau i Palauli le Falefa ma Salega, ia o vaivaiga na o lenei sui usufono. O le a se taimi e lava ai lau faasoa, ia o lena ua tuutuu atu i ou autafa.

Ona ou oo mai lea i lau Afioga i le Minisita o Tupe e ona le lafo i luga o le Laulau-a-Fono. O se vaavaai foi a lenei sui usufono, ia, e le o se Tala o se Tupe lapoa pe tele. Ma e matua lagolagoina e lenei sui usufono le Tala o le Tupe, ae i ai foi o matou faalogona e ala i totonu o lenei Maota, leaga o lo o lauga nisi o le tatou Palemene ua leai ni tupe, ua leai ni tupe. Ae lagolagoina e lou sui usufono le Tala o le Tupe. A o le fesili a lenei itumalo, o fea ua oo i ai aitalafu a le tatou Malo? O fea ua oo i ai? A o le a foi se metotia o faia e lau Afioga e totogi ai nei aitalafu? Aua na ou tofu mai totonu ma ou ulufale mai totonu o le Palemene, o le leo lava lea, e ova ma le piliona. Ae leai ma se sui usufono o ou faalogo atu o lauga po o a mai aitalafu a le tatou Malo? O le mea lea lau Afioga i le Minisita o Tupe, o le fesili lena a lenei itumalo, o fea o i ai, o fea o taoto ai aitalafu o tau togitogi nei a le tatou Malo. Leai leaga o lea e faafofoga si o tatou atunuu, e tatau ona iloa mea o lo o fono ai le tatou Palemene, aua le savaliga a Samoa i le agai i luma.

Ia, lau Afioga i le Fofoga Fetalai, pau lea o se vaivaiga ma se lagona o lenei sui usufono aua le usugafono a Samoa. Ona matou manatu lea afai ua i ai se gagana a le auauna ua le tautamalii i la outou faafofoga ma la outou silasila, ia e matua faitama i lau Afioga i le Fofoga Fetalai, malu ave i fale i lo outou finagalo.

Ia manuia le usugafono a le Palemene i ona itumalo e 51, ia manuia foi le faafogafoga a Samoa i so o se tafa. Nai ou aiga i fafo i tafa e fia o lenei lalolagi, faafetai tapuai faafetai tatalo, ae tainane foi o tamafanau a lenei itumalo i so o se tafa o lenei lalolagi. Ia, o lea ua outou faafogofoga i le leo o la outou auauna. O le matou tatalo, i lo outou nopiai ai i tafa e fia o le lalolagi aua se sailigamanuia aua le itumalo ma Samoa, ia manuia lo outou aumau ai i na atunuu. Soifua ma ia manuia lenei vaega o le aoauli.

FOFOGA FETALAI: Malo faafetai mo le saunoaga a le sui usufono mamalu mai Gagaifomauga 2, malo foi faaso. Faafetai foi mo nisi o fesili taua aua foi le Kapeneta mo se tali mai ina ia manino pea le tatou Maota, aemaise foi o nai manaoga o le itumalo. Malo faafetai.

Ua maua le avanoa le tatou... Ia, tulai mai lau Afioga i le Sui Fofoga Fetalai, le sui usufono mamalu mai Aiga i le Tai.

Afioga AUUAPAAU MULIPOLA ALOITAFUA MULIPOLA (Aiga i le Tai): Faafetai i lau Afioga mo le avanoa. Ia sa faatalitali laofie lava lenei itumalo, pe tulai e fai se lagona ma se motugaafa i le Tala Faatatau Faaopoopo o le Tupe lenei. Ae ou te lagona, e lelei ona ou faasoaina le tulai o Gagaifomauga 2.

Faafetai lau Afioga i le Fofoga Fetalai mo le avanoa, se i ou pai muamua lava i lou itumalo ona e i ai le lagona sa leai se leo o le ta itumalo i le Tala Autu o le Tupe i le tausaga na tea nei. E le o po malae, sa tausaili le malosi i atunuu i fafo aua le faatinoina o lou valaauina i la outou puleto. E ui o lea, lau Afioga i le Fofoga Fetalai, e momoli le faafetai.

O paia sauoo o le ta itumalo Aiga i le Tai, o le a ou le toe oo lava i ai, aua e leai lava se atamai e mafai ona toe faaopoopo pe toese, e mai lava i le vavau seia oo i le faavavau.

E faatalofa atu i le paia o le tatou itumalo, e faatalofa atu auauna a le Atua i so o se Peteli o lo o outou faanonomanu ai aua se filemu mo oe Aiga i le Tai o le Feagaiga.

E faatalofa atu foi i so o se Samoa o faafogafoga tapuai mai i atunuu e mamao. Faamalo faafetai. Ae tapuai maia se i fai so tatou sao ia manuvao i le Tala Faatatau Faaopoopo o le Tupe ua opea nei i le Maota Fono o le atunuu. I le Tusi Faitauaso a le Ekalesia EFKS e tusa ai o lenei aso, o le matua o lo o tusia faapea, “Ua na o le Atua e te auauna i ai.” O upu ia na fetalai i ai le Faaola ina ua faaosoosoina i le mauga e le tiapolo, ua fiu e le mafai le malosi o le Alii, fetalai loa Iesu, “Ua na o le Atua e te auauna i ai.”

Le paia o lenei Palemene, e momoli lau faafetai i le tapenaga a lau Afioga i le Minisita o Tupe e tusa ia o le Tala Faatatau Faaopoopo o le Tupe. Ua pasia e Aiga i le Tai, malo faafetai.

E faapuupuu lava se manatu se i sui tonu le mata o le niu, tulou le afioaga e afua ai lea lafoga. Faafetai i le Minisita o Galuega i lou tali mai a o naumati lou motu o Manonotai i lena vaiaso. E momoli lau faafetai i lau Afioga. Faafetai foi i lau Afioga e tusa ai o le meniteni po o le maintaineina o auala o lou itumalo, ua ou matauina faafetai. E momoli lau faafetai. Na pau lava lea, se toe tasi lava si mea lea e misi, masalo e te faamaoti mai ma e faamanino, o lou uafu ae tuu atu le avanoa i lau Afioga. E moni e le o i i i le Tala lea o le Tupe, ae pei lava ona ou fai atu, leaga ou te le i faia se leo o lou itumalo i le Tala Autu o le Tupe.

E fia fai se faamatalaga e uiga i nai galuega a lou itumalo, onosai mai, e i ai le lagona ia te au i le taimi lenei o lea e fou le vaa o le Malo, ina ia tatou femonoti le paia lea o le Palemene aemaise o le Kapeneta, ae i ai lava lo tatou taimi i le faaso. Ae onosai mai lo tatou itumalo. E le aoga foi le felulutai o mea e tasi i le Kapeneta, e tupu ai le fefilo, ae ou te iloa e i ai lava le taimi e faamuamua ai tatou tatou itumalo.

Ou te fia tautala i le VAGST lea e ao mai faleoloa. Ou te le faia se tala e faatupu po o se tala na ou tosoina mai lagona o se isi tagata. I le vaiaso pe a ma le lua i le tolu vaiaso talu ai, sa ou alu e fai lau faatau i se isi o faleoloa, o le a ou le taua le faleoloa ne i afaina le tamaliaga o le pisinisi. Fai lau faatau e \$1,712.00. Ou sau o le a totogi le faatau, ae ou tilotilo atu, e faaoga le lisiti foi lea, le api lisiti. Ona ou sau lava lea ma lau faatau ou mafaufau, e leai se VAGST o i luga o le lisiti lea e tusi mai. Ou toe alu i le taimi lava lea i le aso e tasi fai lau faatau, e \$84. Ma lou maitau atu, e ese la le mea e ave e totogi ai lau faatau lea ua totogi i le masini foi lea e totogi ai masini. E tasi le aso ae ua toe faafoi le oloa o le \$1,712 lea ona e le sao lona faaogaina. Ae ou alu atu, o le fiafiaga ia te au le tagata faatau, ua toe maua lau tupe. Ae ou te manatu pei lava e sao au, ne i te i ua ou sese ae faasao mai la au e le Minisita e ou le Tulafono, pei lava e i ai le vaega o le Tulafono e tatau ai ona e toe tagatagai i se oloa e fetau ma le tau o le refund lea. Ae ia au o le tagata faatau, ua ou fiafia ua toe maua lau tupe.

O le mea na ou matauina i le alo ese o faleoloa, e le o faleoloa uma, a o nisi faleoloa i le aoina o le lafoga lea. Ou te faafetai i lau afioga i le Sui Palemia, o lea sa e taua ananafi, malo faafetai i le galuega fita, ou te le faapea la e le o faia. Ou te matua mautinoa o lea e fai, a o le mamafatu lea e feagai ma lau afioga i le Sui Palemia.

A o le agaga o lenei itumalo, a faapea o le faiga lea o lea e fai ai le tele o isi faleoloa, o le fautuaga, se i ma le aa, aua le alofia i ai le Tulafono. E leaga o lea ou te iloa e i ai le tele o avanoa faapenei e le o aoina ai tupe a le Malo. Ou toe alu atu lea i le isi aso, vaiaso lava lea pe a ma le tasi le aso talu ona tupu le... ou toe alu atu faafoi lava le oloa o le lisiti lava lea e \$1,712. Fai mai le tala a le faatau oloa ia te au, "O le a le avatua lau GST". Ia ou tu loa, ua ese la le uiga lea ua sau ai ia au. Tulou lava Samoa ma la outou faafofoga, ua faavalea sao lava au. Ou tu loa i i, ese foi le story o lea

mea. Ona ou manatu lea, o faafitauli ia o lea e tupu mai, o tupe le maua ia a le Malo. Ae ou te faafetai i lau afioga i le Sui Palemia.

O le fautuaga a le itumalo, faamalosi atu, tatou tutu i le Tulafono, rule of law pe a faapea o le tele lea o le tamaoiga o le atunuu e le o mafai ona ao, na ona ou faapena atu. O le faleoloa, nauna lautele tagata mai Asia.

Foi mai se tautalaga i mea tau vai. E lua vaiaso talu ai sa ou alu ai i Savaii se i faatafafafo tamaiti ua asiasi mai foi. O le a ou le taua le faletalimalo, e ese le manaia o le motu i Salafai. O le uiga o le faamatalaga, o le va fesootai o le vai tumaoti lea e pulea e alii ma faipule ma le vai lea o SWA. O le vai lea o SWA o le vaimanino la e mita le vai e taumafa ai lo tatou atunuu. Ona alu ai alu ai lea o le matou nonofo manaia le tafaoga ma le fanau. Ae oo i le afiafi faaletonu mai le paipa, tulou le gagana ua pei ua sualua mai ua enaena, ona ou iloa lea, e le lelei i se taumafa. Ona ou fesili lea i le teine, o le a le mafuaaga? Fai mai, malie lou finagalo, leaga o le vai lea o le vaitumaoti o le matou nuu. Ou fai atu, oi, o le a la le umi e faatali ai ni vai mama? Fai mai, toetititi aena lava. Na matou foi mai lava e leai se vai mama.

FOFOGA FETALAI: Malie le sui usufono mamalu Aiga i le Tai se i tuu atu le avanoa i le sui usufono mo Vaisigano 1. Saunoa mai le sui usufono.

Afioga Niuava Eti L Malolo (Vaisigano 1): Lau afioga i le Fofoga Fetalai, na o sina vaega lava e fia faamanino ona o lea e aiga le folasaga foi a le sui usufono mamalu i le tulaga, leaga o lea e faafofoga le aufaitau Tusi Paia o le lalolagi aemaise foi o faafeagaiga. E leai, o le faasaoga o le autu ne i te i ua faapea mai le aufaigaluega e le faitau Tusi Paia Aoao Fesoasoani i totonu o le... O le autu la e i ai, “Ua tusia.” Ona alu loa lea o le faamatalaga o le alu loa lea o le faamatalaga lea e saunoa ai mulimuli, ia o le fesootaiga foi lea leaga o lea e faafofoga tagata ma le aufaigaluega tofofi, i faapea e sese le Tusi Paia lea e taitaiina ai tatou. O le faaupuga la e i ai o le autu, “Ua tusia.” Ma lou faaaloalo lava. Faafetai.

FOFOGA FETALAI: Oi, faapea lava au o se vaega o le itumalo lea, ae... Ia, lau afioga i le sui usufono mamalu mo Aiga i le Tai.

Afioga AUUPAAU MULIPOLA ALOITAFUA: O lea foi e tusia, ua na o le Atua e te auauna i ai, o la foi e tusia. Aua e te atumatagi lau susuga i le Aoao Fesoasoani.

Foi mai se faamatalaga e pei ona ou fai atu, i le taunuuga o le faia o le faamatalaga, at the end of the day, pe vai tumaoti pe vai tumama, a o lou concern, o le soifua maloloina.

Afai o i ai ni faiga faavae a afioaga i vaitumaoti ia, pe mita le suavai po o le a lava, lafo atu i le faaiuga a alii ma faipule o afioaga, ae o le naunautaiga o le soifua maloloina. Ou te mautinoa foi o lo o fai le galuega a le Minisita, e aumai samples o vai ia e test. E ui lava e le o i i le Tala Faaopoopo o le Tupe, ae ou te mautinoa o la e fai.

O le tuualalo a lenei itumalo lau Afioaga i le Minisita, se i toe tagai ane, a o Savaii lava ia i le motu e ese le manaia. Faafetai.

Se i fai sau motugaafa i le vaalele...

Tofa Hon Olo Fiti Afoa Vaai: Lau afioaga i le Fofoga Fetalai...

FOFOGA FETALAI: Lau afioaga i le sui usufono se i tulai mai le afioaga i le Minisita...

Tofa Hon Olo Fiti Afoa Vaai: E taua lava le mataupu lea ua laga e le Afioaga i le Sui Fofoga Fetalai. E moni lava e taua ia, e faapena foi le silasila a le Pulega o le Suavai i le tulaga lea o vaitumaoti. E le o i ai se tulaga foi lea faamalosi i lalo o le Tulafono e ao ai ona faataatia vaitumaoti ae agai mai i le pulega a le suavai o le SWA, lea e mita a tatou vai na.

Na pau lava le mea o lo o i ai lava faafitauli vaeatu le paia o le Maota, ma le faafogafoga a le atunuu, o vai ia a malosi loa le mugala ua le toe i ai se vai, ae a ova foi ma malosi timuga, ia ua i ai la le tulaga lea o le suavai palapala, e moni ai le saunoaga. O lo o avatu lava le avanoa e le Pulega i alalafaga foi o lo o faaaogaina vaitumaoti, ia silasila totoa foi i le tulaga o le soifua maloloina e pei ona saunoa i ai le Sui Fofoga Fetalai. E i ai lava popolega foi ia a le Pulega aua e le taofia, a o le tilotilo a le Pulega, o le mea muamua lava e leai se agavaa lea e i tua i nuu ia e i ai vaitumaoti, latou te mafai ai ona faia maintenance o vai, e tasi lena vaega ma tulaga faapena. E le o i ai foi ni treatments e faia, mea foi ia o siama ma tulaga vaeatu le faafogafoga a le Maota, e treat ai vai ina ia saogalemu i le fofoga taumafa o le tatou atunuu.

E pei o vaega lava na o lo o avatu ai lava le fautuaga, ina ia liliu mai i le SWA ia vai ia, e pei foi la o le suavai a le Afioaga i le Tamaitai sui usufono. O lena foi vai i Manase o le independent water. E i ai foi le talosaga lena, ua fia fesoasoani atu lava le Pulega i le tulaga o le suavai mama, ae o le mea lea e tulai mai, e tutumau lava alaalafaga i latou vai ia. E pei e le mananao e oo atu le pule a le Pulega o le Suavai i le mitaina o vai, ae pei e talosaga mai na ona matou o atu e faalelei ona toe o ese laia. O lea ua manaia o lea ua laga se tasi o mataupu lea, a fia taumamafa i vai mama ma vai e le o i ai ni siama, tulou, ia, agai mai i le Pulega o le suavai tatou te feola faatasi ai, ma le agaga faaaloalo. Faafetai.

FOFOGA FETALAI: Malo faafetai. Ia se i tulai mai lau Afioga i le Sui Fofoga Fetalai, Aiga i le Tai e faaauau le saunoaga.

Afioga AUUAPAAU MULIPOLA ALOITAFUA: Faafetai ua fofogamaua le Maota i lau afioga i le Minisita, faafetai o le agaga lava lena e tasi o le soifua maloloina o le atunuu, ae momoli le faafetai.

Ona ou oo mai lea i le mataupu lea e uiga i le vaalele, o le tausaga lea ina ua ou ulufale mai i le Maota lena, ia o le mataupu lava lea sa ou mafaufau i ai ma ou faalogologo ai pea, ma apoapo sou manatu i ai e uiga i le mataupu lena o le vaalele. Ae o au lava ia, ou te faafetai ua leai se vaalele, o le upu sao lava lea ma lau finau. Ua faafetai i le faatofalaiga a le Malo ma le faatofalaiga a Afioga i Minisita. Ne i fesili la se isi, e mafua i se a? O lea o le a ou faamatala atua lou lagona vaivai. O le vaalele lea tatou te i ai nei faapea o le Samoa Airways o lea e tele ai finagalo faaalua. O le tulaga lava ia tau Airline Industries, e le faigofie, leaga sa ou i ai i le 24 tausaga. O le faatinoina o le vaalele lea sa i ai ma le Kamupani Vaalele ina ua toe tatala nei i nai tausaga ia ua tea atu, e le i lalo o le faalapotopotoga lea a Airlines e tau o le IATA, o i ina e merge uma i ai airlines o le lalolagi, faavasega lea o latou vaegatupe e mafai ai ona totogi e le isi airline le aitalafu i le isi airline. O le airline la lea sa tatou i ai o le Samoa Airways e le IATA.

E mafua se faamatalaga ona o lea lava tatou te anau ae o lou lava lea talitonuga. Mo le taimi nei, i le leai o se vaalele ou te faafetai. A la lea ua tele vaalele ia ua omai, ina ne i tatou anau na o le pay o le pasese pau lea o le revenue, ae ou te tilotilo lava au ia. E tele revenue e maua mai i grant handlings ma isi vaega o le palasi o vaalele, e maua mai i le aviation maua mai i le immigration maua mai i le custom ma isi mea.

Afioga Peseta Vaifou Tevagaena: Lau afioga i le Fofoga Fetalai, o le mea e fia faasao lau Afioga.

FOFOGA FETALAI: Malie le sui usufono se i tulai mai le sui usufono mo Faasaleleaga 5. E faasao le a, faasao le vaalele?

Afioga Peseta Vaifou Tevagaena: E fia faasao le mea lea e saunoa i ai le

FOFOGA FETALAI: Se i saunoa mai....

Afioga Peseta Vaifou Tevagaena: Ona o lena mataupu sa ou laga i lau lauga. Masalo e le o maua e le Sui Fofoga Fetalai, e eseese ituaiga pisinisi i le soifuaga lena. O lena lava pisinisi o le pisinisi e gau i so o se atunuu. Ae le o faatauaina e le atunuu le gau, e faatau e le atunuu le auaunaga. Ae

aua ne i galo foi i lau Afioga e moni e lele gau ia vaalele, a o oloa ia e feaveai. A fua mai foi i totonu o le tatou atunuu, tatou te felelei lava i faalavelave i aso uma, aso uma, aso uma. E moni o lea tatou te gau i le tatou vaalele i lea taimi ma lea taimi, a o isi resource ia a le Malo, o lea e faatumuina le pu lea, e faapena le faiga o le soifuaga lenei. E i ai pisinisi e faaalu, e alu gau. E ala ona alu gau, e le o le gau i mea tau tupe, ae sikuea i le auaunaga mo ona tagata. O le agaga lena na ala ai ona ou fai atu, aumai le tatou vaalele, ioe, aumai le tatou vaalele. A lea e ave lava i vaiaso uma le koko Samoa, o le masi Saina, o le keke puua. E ala ona ou fai atu, leai o lea ou te tautala sao, leaga o lou afafine lea ou te tautala atu ai. E toetiiti lua afe keke Saina ma koko Samoa e ave i vaalele air cargos, every Friday. A o ai lea e inu ai i le tupe lea? O lea e inu ai le Air New Zealand, inu ai le Quanta's inu ai le vaalele a Fiti. O le ala lea e ala ai ona fai atu, tatou te gau i mea nei o vaalele, a o lea e sikuea ai le mamalu o le atunuu i isi foi ituaiga pisinisi. O le mea lea e fia faasao lau afioga.

FOFOGA FETALAI: Ia faafetai. Mea sili o lea ua malamalama...

Tofa Olo Fiti Afoa Vaai: Lau Afioga i le Fofoga Fetalai, o se mea e fia faamalamalama...

FOFOGA FETALAI: Oi ia, leaga o lea ua... Se i tulai mai lau Afioga i le Minisita leaga o lea ua tau le vaalele.

Tofa Olo Fiti Afoa Vaai: Faafetai lava o lea ou te manatua sa galue ai le Afioga i le Sui Fofoga Fetalai i na vaitaimi i le tatou kamupani vaa, i lalo foi o le taitaiga a le la itu o le Maota. E moni lava le saunoaga a le sui usufono mamalu o Faasaleleaga e gau, e so o se pisinisi lava po o se kamupani vaalele e faapena, pe na o le lua, tolu, fa tausaga gau, ona amata loa lea ua tau maua sina tupe pe a run faapisinisi. A o le tatou vaalele lea, e ova ma le 30 tausaga o gau lava, o alu galu ai lava. A fua atu la i ai, e a e sese lau tala lau afioga i le sui usufono mamalu? Ona amo ai lava lea e le atunuu, avatu ai tupe o isi pisinisi e tau fai mai. E ova i le 30 tausaga o taumafai mai le Polenisia e oo mai lava i le Samoa Airways, o la e fai gau lava, ae ua leva ona tataua ona maua sina tupe. O lou faatamala lea na mafua ai ona le faia le mea lea.

Afioga Peseta Vaifou Tevagaena: Lau afioga i le Fofoga Fetalai, e ala ona ou talanoa i le tulaga lea, leaga o mea o pisinisi e faapena, e i ai pisinisi a so o se Malo, e moni lava e gau, e gau i lona faatinoina, ae o le tele ia o le aoga o le gau lea. O le a le uiga o le aoga o le gau lea? O le auaunaga i tagata o lona atunuu. E moni la e gau i le lele lea, a o cargos ma oloa ia e ave i fafo, a lea ua toe fekavaai, leaga o le mea e pei o le circle, its

like a circle, e pei lava o le mea lea. Ioe e alu atu gau i i, sikuea mai i i, e pei lava o le Palemene.

FOFOGA FETALAI: O lea ua maua lou finagalo, ae finagalo malie le sui usufono mamalu, o le taofi lava ia o le Aiga i le Tai lea ua aumai. A o lea ua agia lou finagalo, manaia e taua tele le faipisinisi, ae ese foi le auala o le feau a le Aiga i le Tai lea e taumolimoli atu e aoga foi. E le mafai foi ona tatou taofia lagona o sui usufono mamalu o le Palemene. O le mea lea lau afioga i le Aiga i le Tai, ua lava ia na vaalele ma le umi ai o le tatou taimi.

Afioga AUUAPAAU MULIPOLA ALOITAFUA: Ua lelei o le a ou see ese mai le vaega lea. A o lou lava lea manatu lea ou te fai atu au ia. Ia malie le sui usufono, ua e faafofoga foi i le tali a le Minisita, a avane ai le taimi o IATA, ia o tulaga na. E le i avatua lava sau upu, a o lea ua e saunoa mai i le gau, e pau lava le mea o le fetuugaiga o lou manatu. Ae ui i lea o le a ou see ese.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai, pe maua se avanoa.

FOFOGA FETALAI: Malie le sui usufono, o le a toso foi le tatou mataupu i le.....

Afioga Sulamanaia Fetaiai Tauiliili Tuivasa: O se mea e fia faasao i le Tulafono Tumau po o le 82, po o le 83.

FOFOGA FETALAI: O le a le mea lena e i le Tulafono Tumau lena?

Afioga Sulamanaia Fetaiai Tauiliili Tuivasa: Ina ia mafai ona....ona o lea e taua soo lava e le sui usufono le IATA ea po o le IATE, e le o malamalama, e manaia lee faaluaina le finagalo o le Minisita o le LTA, o le sui lea ua leva ona galue i totonu o le Polenisia. Ae mo le fia faafofogaaga a le atunuu, o le a lea mea o le IATA po o le a...ina ia mafai ona talanoa i le faauigaina po o le a lea upu ona leaga o lea e fou i le faalogologo a le atunuu i lea upu, e pau lava lena o le mea o lea e fia.....ae sao le sui ua leva ona galue i totonu o le Polenisia, o le isi lea sui lea na gau ai le Polenisia, lea na i ai i totonu i le taimi lena.

FOFOGA FETALAI: Saunoa le sui usufono mo Aiga i le Tai.

Afioga AUUAPAAU MULIPOLA ALOITAFUA: Malo faafetai, ona e tulai mai le sui, o lea ua tau see ese ae ua lelei e le augata le sui e faamatala. O le sao o le upu o le IATA o le International Air Transport Association.

FOFOGA FETALAI: Ua a la, ua manaia i lau faalogo? Ua e maua lelei mai la le mea lena.

Afioga Sulamanaia Fetaiai Tauilili Tuivasa: O lea e maua mai le faaumiga a o le faa-Samoaina.

FOFOGA FETALAI: Ia malie le sui usufono mamalu, o lea ua manino le mataupu, ia see ese loa le sui o Aiga i le Tai ma le...

Afioga AUUAPAAU MULIPOLA ALOITAFUA: Malo, faafetai o lena e te faamauina i lalo. Ona ou see mai lea lau afioga i le minsita e ona le polokalame lea o le WiFi e ave i tua mo aoga, e momoli lau faafetai i le Minisita lea o Fesootaiga ae vaavaalua ma le Minisita o Aoga, faafetai lava. Ae o le talosaga a lenei itumalo ona e 3 motu, ia faaola loa, o lea o le a ae aoga e talosaga atu ai. Ina ia faaola loa ia ia vaega o le auunaga foi, lau Afioga i le Minisita o Aoga ma le Minisita o Fesootaiga.

Ona ou oo mai lea i le Ofisa o Leoleo, e masalo e pii faatasi le faamatalaga lea, i le Ofisa o Leoleo ma le Ofisa o Felauaiga i luga o auala tetele. E avatu faafautuaga, e le faapea e le o faatinoina le galuega. E to lou pulou i galuega a malu o le Malo, o se galuega faigata. O le galuega foi lea tatou te le iloa le malu o le Malo i le tuua o le aiga pe toe foi mai, o la e alu e tautua le tulafono.

E pau lava lau fautuaga, ona o le tulaga lea i moli auala, leag ua ou matauina, leaga ua le tasi ia... E i ai vaega o le tulafono lea e i ai, e pei a avanoa lou agavale, ona mafai lea ona e afe ai i moli auala ia. E pei se mea foi lele, e faapea le uiga o le tulafono, e aua ne i e hold iga le queue lea e i tua o oe, pe a o la e flow le traffic. E matauina la o la ua ave i le vaitaimi lenei. Ae ua i ai ma le mea ua ou matauina ua sui ai, ua i ai ma taavale a latou vaai atu i le intersection lea o la e avanoa le isi itu, ua alu loa i le moli lea e lanu mumu i le taumatau. Toeititi lava ou faaletonu i le isi po lea na tuua ai le tatou fonu, ae ou alu atu i le magatolu lea e i...e le faapea e le o faia le tiute o outou leoleo. E pei lava ona ou fai atu, faafetai i le Komesina ma le Matagaluega, ae pei e lelei lava le mataitu. Ou te iloa e tasi lea o vaega lea e tutupu ai faafitauli. E taotolua le seuga ma le Matagaluega o Taavaleafi, ua ou matauina le faaleagaina o meatotino a le Malo, i le tele o auala agai i gauta i Faleata. O se laupapa ua tuu mai ai se faasinomaga o se magaala, tulou le gagana, foi mai pe a...ua tu lava na o le pou ae ua leai se laupapa, ma le tele o meatotino a le Malo. O au le isi tagata e fai lau

galuega pe a ou tau atu i ni tagata o faapea. Ou te manumanu i meatotino a le Malo.

A o lau fautuaga, malie lau afioga i le Minisita e tuu atu i ou tafatafa, i le laupapa lava lea e i luga lea e tu ai le stop po o le give ways. O le a le mea e le fai ai se tatou faiga, e maka loa le auala, e pei lava o Niu Sila. O Niu Sila i le taimi na ou alu atu e sue lou laisene i Niu Sila, maka loa le auala i le samasama ina ia tau mai lava stop, means stop aua e te toe alu, tu aua le toe migoi pau o le taavale, give ways e faapena lona faauigaina. Ona o le agaga lenei ia te au, e i ai le taimi e faaoga ai e le tagata le mea faitino e faaleaga ai le laupapa lea tulou lava le gagana. E leaga o lea e paepae solo ala, a o le tosiina o le auala lea, e tulaui lava i ai le vaai a le avetaavale i taimi uma, taimi uma. E i ai le taimi e tau le vaai i luga ona o le concentration i le auala, ae pei e faapena sou agaga, atonu e tulai mai ai le faaitiitia o meatotino a le Malo e faaleaga. O nei lava vaitaimi i tupulaga tatou te taumafai e aoai ae le mafai lava. A o se agaga e tuututu atu i autafa o lau afioga i le Minisita. Ina ia kosi lelei le auala o le vaega lea e tatau ona e tu oe, o le vaega lea e tatau ona e give way oe, ma faaauau ai lava lea faapena.

O le isi itu ua ou matauina e le o se tala e fatu. O lo o i ai le vaega o le auala, aemaise lava o le matou pitonuu i uta. O le auala lea e faatalitali ai le taavale i le ogatotonu e fia afe i lona itu taumatau se i avanoa, e tusa o le tulafono. Ua ou matauina le tele o taavale, e leai loa se pakaga o le faleoloa le e fia faaoga, emo fa loa i i, i le ogatotonu lea. E alu atu ta ita ua ta fia afe i le faleoloa ua fai ai faapena. O se soligatulafono i lau lea matau. Toetiiti lava ou tago e pue i lau telefoni. Ae ui o lea, tuu atu i tafatafa o le Matagaluega, o se soligatulafono. Ou te iloa e pau lava lea o le vaega e fai i ai le tulafono lea pe a e fia afe i le itu taumatau. Ae ou tu ma ou tilotilo i tagata na omai i taavale ia, e sii mai faatau, omai loa faaola taavale ma o. E mo le saogalemu o si o tatou atunuu. Ae ui i lea o le fagufagu lona a le Aiga i le Tai lau afioga i le Minisita.

FOFOGA FETALAI: Ia malie le sui o le Aiga i le Tai se i tuu atu le avanoa i le Minisita o Galuega.

Tofa Hon Olo Fiti Afoa Vaai: Ia faafetai i le Afioga i Sui Fofoga Fetalai mo le laga o lea foi mataupu taua. Mo le silafia o lea ua saunoa i le tulaga o le fia fai o ni tatou maka ia stop. E mo le silafia, o la e i ia tatou maka na, pe lima mita mai humps ma mea faapena, aemaise a crosses foi lea e i luma o faleaoga. O la ua i ai tatou laina na e taofi ai taavale, ae matauina lava, o la e faafogafoga mai le mamalu o le atunuu. E matauina lava e le o... e pei e le amanaia e avetaavale le mea lona. E i ai lava taavale e omai tutu ai lava i luga o kolosi ia ma humps ia. Ae sa tatau ona faatali sei avanoa ona faatoa, ae tutu i tua o laina na. O laina na sa maka e le LTA

ina ia ...ua uma foi ona faatulafono. Ae pei o tulaga na e le o amanaia ma usitaia e le mamalu o le atunuu. Ia le mea lea o le omai ua putuputu mai taavale, sau lava lea o le laina omai tutu i luga o le kolosi. Ona o atu loa lea o tamaitai aoga ua kamikami solo ai i autafa. Ae i ai lava le agaga e tuu atu pea i malu o le Malo, latou te faamalosia le tulafono lena i mea lava ia o kolosi i luma o faleaoga leaga o la ua uma ona maka. Ae o le tulaga lena, a faapea ua vaai atu, e fuafua lava, a vaai atu o la e le ofi lana taavale i le isi itu, tu i tua o le laina lea, ae faaavanoa le kolosi. E pei o le tulaga lena lau Afioga i le Sui Fofoga Fetalai, o lo o i ai lava tatou maka i luga o tatou auala. Ma le faaaloalo.

FOFOGA FETALAI: Faauma mai le saunoaga a lau afioga.

Afioga AUUAPAAU MULIPOLA ALOITAFUA: Ia malo faafetai, ia o lea ua faafofoga mai le atunuu. Ia faafetai i lau afioga i le Minisita e sao lelei lava. O le toe fagufagu lava ia a le tautalaga e pei e faapena se agaga. Ae faamalulu atu ne i te i ua papatea ni lagona o nisi, ae o le agaga lena.

Lau Afioga i le Fofoga Fetalai e fia pai i si ou itumalo. E momoli atu lau faafetai tele lava, taoto ia paia o lo tatou itumalo e pei lava ina ou fai atu, i le taimi o muamua. O mataupu e uiga i le tatou miliona, o lena ua uma ona ou faatavale atu, ua saunia le tumau i le afioga o Apolima Uta, ua uma ona fai le feagaiga. Ua uma foi ona saunia le nofoaga fou ma le nofoaga tumau, o la e tau faamaea nisi o pepa e ono ao ona saina.

O lau fautuaga, e pei ona outou faafofoga mai i le Maota, o lena lava le mataupu, a o lau fautuaga Aiga i le Tai, ia toa le tai ia i tatou, o lo o faasolosolo atu pea taumafaiga a lau Faigamalo aua le atinaeina o le tatou itumalo.

Foi mai se faamatalaga, alofagia e le Atua lo tatou itumalo, le paia sauoo i tapaa, ia fuga tootoo ia te outou faleupolu tofia tutaumalae.

E avea foi lena avanoa e faamalosiau atu ai ia oulua susuga i faafeagaiga o lo o faataotolia le fala, apusia le falaefu i lau susuga Maluelue Lima Pone ma le faletua, foai e le Atua le malosia i lau susuga i le faafeagaiga taulagi. E faapena foi ona ou manatua le faafeagaiga taulagi i nei i Faleata le susuga ia Muao Fagasua ma le faletua o lo o tuua le atunuu, ona o sailiga matagi. Ia manuia lo tatou itumalo, manuia le Palemene ma le Kapeneta, manuia lau afioga i le Fofoga Fetalai, ia manuia le Fonousu a le atunuu faafetai.

FOFOGA FETALAI: malo faafetai, malo saunoa i lau afioga i le sui mamalu o le Aiga i le Tai, po o lau afioga i le Sui Fofoga Fetalai. O lea ua faafofoga le itumalo ma le maota malo faaso. O lea e matau atu ua fou mai le sa o Vaimauga 2, le afioga i le sui mamalu.

Tofa LENATAI VICTOR FAAFOI TAMAPUA (Vaimauga 2): E faamalo faafetai i lau Afioga i le Fofoga Fetalai e tusa ai foi ma le avanoa mo lenei sui usufono. E avatu foi se sao aua le Tala Faatatau Faaopoopo 1 o le tupe 2022/2023 malo faafetai.

E fia faatalofa atu foi i le paia ma le mamalu o le tatou Maota nei, lau afioga i le Fofoga Fetalai, Sui fofoga Fetalai, tainane le afio o le Sui Palemia, le nofo a Minisita o le Kapeneta, Minisita Lagolago. E faatalofa atu foi i lenei Itu o le Malu i le Sui Taitai aemaise foi sui usufono mamalu. Ia faapea foi i latou sa teena lau afioga, ae o lo o faapena ona e alofa pea ia i latou, faamalo faafetai.

Lau Afioga e muamua ona faamauina le faafetai i le afioga i le Minsitia, Minisita Lagolago aemaise le Ofisa Sili o Pulega ma le Matagaluega i le latou galuega fita o le tuufaatasia o le tala faaopoopo o le tupe. Aemaise foi o le faafetai e fia faamauina, i le komiti o Tupe Maua, le afioga i le Taitaifono, sui Taitaifono aemaise sui mamalu o le Palemene i le latou foi pitolaau. E fia faaleo foi e lou nei tagata, ia le lagolagoina foi e lenei itumalo o le Tala Faaopoopo o le tupe 2022/2023. E pau o lea, o nai mataupu e fia tuu atu ai foi se manatu o lenei itumalo, e pei ona tatalo mai foi i lau afioga, o lauga faalauaitetele aua le tamaoaiga o lo tatou atunuu.

E muamua lau Afioga, ou te manatu e le faaumiumia se faamatalaga i lea vaega. O le toatele o nisi sa faapena ona laga, ae tau ina avatu ona e i ai nisi o lenei itumalo sa faapena ona oo mai o latou lagona i le mataupu lea, o lea komisi lea o galuega.

E pau lava le tuualalo lau afioga a lenei itumalo, o avanoa ia o lo o faatupe i lalo o le tala faatatau o le tupe o lenei tausaga. O le tuualalo ia vave ona faatumu, o le popolega ne i maea le tausaga faaletupe le ausia ia sini autu e pei ona faataatitia e Matagaluega ma Faalapotopotoga ona fai lea ma lape ia i latou, e pei o se tuualalo le e avatu e lenei itumalo i le vaega lea.

O le vaega lua, e tele nisi o manatu na avatu e nisi sui usufono i le vaega lea o le faafouina o laisene pisinisi. E pau le tuualalo a lenei itumalo, o le faasea sa faapena ona fia faaleo i luma o le Minisita aemaise foi o le Matagaluega, o le timing. O le taimi sa faatino ai lea gaoioiga, ua oo i le masina ua amata ona faafou ai laisene, ae aumai loa le vagea lea ua tatau ona faatino. E pei o tulaga ia o lea sa fia faaleo atu e lenei itumalo i le vaega lea.

Lau Afioga ina ua maea le faamoemoe o si o matou aiga i le po anapo, sa i ai nisi o le matou nuu sa faapea mai, sa o matou faalogologo mai i le tatou fonu i le aso ananafi, ma sa faapena ona latou maua ai le faamatalaga i le Afioga i le Minisita o Faatoaga ma Faiga Faiva e faapea, o Vaimauga 2 le isi itumalo, o lea o lo o taulamua nei i le vaega lea o le poloketi o le miliona. Sa ou faasaoa lelei i le po anapo e sao lelei o lenei itumalo, e faapena ona fai mea faalogo poo lea se mea e ona mai ai se manuia o le

itumalo ma ona tagata, e fapena ona faagaoioi e faaminoi aua le faamanuiaga ina ia maua. Ua maea ona maua le matou 200 afe i le Tala Faatatau o le tupe ua tuanai. O lea ua foi ua saini mo le faafofoga foi o le matou itumalo, talitonu o loo iai nisi o loo fesili pea o lea ua maea ona saini le miliona. Ae pau a le vaega lea ua faamatuuu mai mo le tala faatatau o le tupe tausaga lenei na o le 150 afe. Pei ona silafia e faagaoioi ai le ofisa mo administration cost ma nisi o operations mo le tatou ofisa. O le taimi lenei o loo faatalitali ia le komiti ma le ofisa i le taimi e faamatuu mai ai le 850 afe lea o loo totoe, mo le tausaga faaletupe lenei. O le tatalo ma le tuualalo ma le taumafai atu foi a lenei itumalo i lau afioga i le Minisita o Tupe aua pei o lau afioga lea ua fai ma sui i lenei taimi, a o toesea foi le Minisita o Tina ma Tamaitai ona o nisi o tulaga tau i le galuega. Tatalo atu ma le agaga maualalo ona o lea ua toe 6 masina lea e totoe o le tala faatatau o le tupe o lenei tausaga. O lea e sau i aiaiga pei ona faataatitia mai e muamua ona faamatuu mai le 425 afe seiloga ua maea ona faaaoga ma avatu se tala o le tupe faatoa mafai ona faamatuu mai le isi afa. E pei ona taua e toe 6 masina ia e totoe, ae pe a se finagalo lau afioga i le Minisita o Tupe aemaise foi sui mamalu o le komiti o loo faafoeina le tatou polokalame. Ae a pe a faamatuu uma mai ai loa 850 afe lea totoe sei faagaoioi i totonu o nai masina ia totoe ona e le faigofie. Lau Afioga talionu o loo silafia ua maea ona faataatia la matou fuafuaga faaletausaga i le tausaga faaletupe lenei, i polokalame fia faatino mo lea nuu ma lea nuu. O le mea lea e faatali ai o le avatu loa o le seleni faaaoga loa faatino ai le faamoemoe ia polokalame. A o le faatinoina foi la e le faigofie. E iai mea e manaomia ona faatau mai e faatino ai poloketi taitasi o nuu ma afioaga. Pei o le talosaga lea pe a mafai, o le a se taimi lata mai, tatalo leiloa poo le masina lenei e pei ona fofoga e nisi o le Matagaluega. O le a faapena ona faamatuu atu ai le afa, a mafai ona aumai uma le 850 afe, o se mea lelei lea e mafai ai ona faagaoioi ona o le puupuu o le taimi lea e totoe nei, lua tolu masina e faatino ai le 425. Oo mai ia Iuni e lei mafai ona fai se gaioiga i le isi vaega o le seleni, pei o se tatalo lea ma le agaga maualalo i le tatou Minisita o Tupe aemaise le tatou faigamalo. Lau afioga i le Fofoga Fetalai. Pau lea o nai vaega sa faapena ona fia avatu ai foi e lenei itumalo tauala i lou nei sui, a o le tatalo ia agalelei le Atua i lau Afioga i le Fofoga o le Maota aemaise lou soatau, le Sui Fofoga Fetalai aua le tautaiina o le fonu usu le atunuu o Samoa. Ia agalelei foi le Atua i le afioga i le Palemia, Sui Palemia aemaise o le tatou faigamalo ma la tatou folauga foi i lenei tausaga. Ia faamanuia le Atua i feau ma galuega ia aemaise o outou tiute e pei ona totofi ai outou, agalelei foi i lenei itu ma le pitolaau foi a le afioga i le Sui Taitai, aemaise foi sui mamalu o lenei itu aua le tatou vaa e fau faatasi. Agalelei foi le Atua i le toe foi atu o nai uso ia i le latou faiga filifiliga, ia faapena ona faamanuia le Atua. Ia agalelei foi le Atua i le tapena atu foi o le itumalo o Vaimauga Nu 3 i le latou faiga filifiliga i se taimi o sauni atu

foi lo latou faiga filifiliga. Faamanuia le Atua ona e pele foi i lou nei tagata aua sa faapena ona matou faifai mea faatasi ma lea foi itumalo, ia agalelei le Atua i le tou faiga filifiliga. Faamanuia le Atua i lenei aso aemaise taualumaga o totoe o le tatou fonotaga faafetai.

FOFOGA FETALAI : Sei saunoa mai le sui usufono mo le Vaa o Fonoti.

Tofa Mauu Siasia Puepuemai (Vaa o Fonoti): O le mea e fia faasao i le saunoaga a le sui mamalu mo Vaimauga Nu 2, momoli atu foi le agaga faafetai tele i lau afioga o lea ua matau ua lamalama faaiu foi ia le fonu usu foi a le Palemene i lenei aso. Ae o le ala o le tulai leaga o lea ua saunoa foi, a fofoga i le saunoaga foi a le sui o le Vaimauga. Ia e faamanuia mai ia matou faamasinoga ma matou faiga filifiliga. Ia o le mea e fia faamalamalama lau afioga, e ala ona tulai ona o au o le Taitai, e leai o lea ua ou maua le tala ia tailo iai, o tala lava e saua i lou taofia o le matou faamoemoe sei maea lelei le paeaiga lenei ma le faaaloalo.

FOFOGA FETALAI: Malo faafetai o suaga lava a le tataou maota, ua lamalama faaiu foi tatou galuega o lenei aso, sei tulai mai lau afioga i le Minisita o Faatoaga ma Faigafaiva .

Susuga Hon Laauli Leuatea Polataivao Fosi: Sa manatu lava e le faalavelave i le saunoaga a le sui lea faatoa maea atu nei. A o le agaga a ia e momoli atu le faafetai tele i lau Afioaga i le sui mamalu, ana faapena uma sui o lenei ituaega lea a se tatou pisa. O le upu sao lenei, mea foi lenei e avatu ai lau tuualalo share ifo lou malamalama i au tama na i ou tafatafa, le mafua ai ona toalia le tatou polokalame ae aua e te popole. Lenatai o oe le isi itumalo lea te lead ina le tatou..le ala lenei o lou faiatu ananfi faafetai i lau tofa manuia ai le itumalo, leaga o o lea ete lead ina a lea ua saina lau 150 lea foi ua e sauni e saina lau miliona ua uma ona saina e le faapea la e te popole uma le ono masina ona leai ai lea o se mea. E uma le 6 masina ae toe kiliki le isi miliona sei silasila la iai aua e te popole base a oe i lau base lenei. You take the lead ma faamalamalama ifo i nai ou uso na pogisa ma le tupu o le faaletonu ae faafetai atu i sui mamalu, keep it up.

FOFOGA FETALAI: Se i tulai mai le sui o..

Afioga ALAIASA MOEFAAUOUO MALAGAITUTOGIAI SEPULONA MOANANU: O ananafi sa saunoa ai le afioga i le Minisita ma taua ai, a o lea ua sau faapea lona lima a ua lavea atu ai ma au i lana.. ae o le a taumafai atu se sao o lenei itumalo e le umi foi lau afioga. Faafetai i le Atua ua taunuu mai le faigamalaga a si o tatou atunuu i lenei tausaga 2023, o loo maua lava le agalelei o le Atua i lana pule faasoifua i le

paia o Samoa. Paia ia aua Aiga ma o latou Tama, o Tama ma Aiga, ia ae a le usoga a Tumua ma Pule, Ituau ma Alataua, Aiga i le Tai ma le Vaa o Fonoti. Maua luga foi le aoina o le masina i le tama o le atunuu le afioga i Le Ao Mamalu o le Malo faapea le Sui o le Fono Sui Tofia, le Palemia ma le Kapeneta ma paia o le tatou malo. Lau afioga Fofoga Fetalai ma le Palemene faapea foi Faamasino Sili ma le Ofisa o le . Ae e iai foi lou talitonuga sa tatou ui mai aso fiafia matauina lava e fiafia a tagata. O se tausaga ese lenei i lau matau au tovaa mai foi o le paia o Samoa mai atunuu mamao talu nei ona tatala tatou femalagaiga. Ta fia maua se lipoti vave foi lea o le suiga o le tamaoiga ole tatou atunuu o le sau totonu o le seleni nai masina ia ua uma nei ou te lagona foi e aoga lea e faaititia ai mea ia o pasene ia o siitaga o le soifuaga ma meauma faapena le ala foi na naunau atu ai le isi taimi lea na mavae atu tatala tatou borders pau a lea o le mea e toe recover ai le tatou tamaoiga. Ae faafetai lea ua tatou vaavaai i ataata o taulelei tapuaiga mau foi a le aufaigaluega ma le au tatalo susuga i aufaigaluega paia a le Atua malo fai o le faiva lo outou faanonogamanu. E talitonu lea ua manuia ai faiva o le malo ona pitolaau foi a Ekalesia. E iai foi le manatu faatalofa atu ile paia o le malo Afioga i le Palemia ma le Kapeneta ia faapea foi lea itu a o loo agaia le malo aemaise foi Taitai o le vaega tutoatasi lea iai ia tatou uso nei. O le mea a lea ua matauina i le taamilosaga o le mea lenei o le polokiki. E te uo ma e faauouo i le fia o tausaga tasi a le taimi tasi a si tamai sasi e pei a o le tiaiina o le fasi falaoa sei tulou lou gutu ma le afi, ma e faifai upu iai ae oo foi ia te oe. A o le mea lenei ou te vaai au ia ou te le faatauagavale ia i latou nei ua ave nei ma, lea tatou te talia poo lea le mea ua oo iai. Ia manuia o outou faiva a o le fesili foi? O fea o iai le tali o le mea lea? O lea i aao o lau Afioga i le Fofoga Fetalai, tulafono e leai se faigata aua e au i le tauola e au i le fagota. E iai foi le isi taimi e tu ai le faaletonu ia te oe ona e faapea lea, pei a e sao le mea lea sa fautua mai ai le sui o Anoamaa. Tulaga foi ia o le fetaaloloai o le atunuu faalogologo i fesouaiga i le mea le i ai nei le faiga polokiki, ia e toa a le tumua ia Lufilufi. Ou te nofonono ma ou matau leaga o le Sao faapito e tausi e Lufilufi ma Atua, o le faigata lenei o le mea ona o lea e vaai atu e leai a se mea o gase, o ou mafauauga faivavale o tagata a o lea foi ua see lo latou sa. Na fai lau tala i le Tutoatasi o le matou faailogaina o le fua Falefa ma Lufilufi ma lenei itumalo, e le mafai ona matou faatauagavale i le afioga i le Sa’o Faapito, ia Salevalasi leaga o le feagaiga e tausi e Atua. O Atua o le Nuu, o Atua o le aiga, sa oo foi i le taimi sa tulai mai ai le isi taitai, leai a se Atua na alu ese. E faapena le uiga o Atua, o lea ou te nofo au ia ma matau e leai a se mea o vevesi ae a vevesi foi, e iai a tootoo e faalauleleia mea e iai. Ua uma ona tofi Samoa e talatau Toga ae Talatofi Samoa. O le matou tuualalo faifai malu tatou faiva, tatou vaavaai ma tuli tulaui i le Atua le faamoemoe o lenei tausaga. O le upu a le Tusi Paia i le tusi a Isaia 41:f 10, fai mai “aua e te fefe aua e te fetepatepaai,

o au o lou Atua, o a'u o lou Atua, o ou fili ma tagata uma ia e faamaina tatou savaliga tepa taulai i le Atua". Fai mai le tusi a Isaia 51, fai mai o lae tusi oe i le aao o le Atua, e galo i le fafine ona faasusu lana tama a o oe e le galo, your name is engraved in the palm of God's hand. E vaavaai le Atua ia te oe mea foi le aua tatou te popole i le agai mai o nei mea. Tatou talanoa poo ua latalata mai le faamai lau susuga ile Minisita lototele, se o lae iai le Atua e puipuia tatou. A ua e manao toe alu se isi tui faatamilo le faiga o le tui e puipui ai tatou, e faapena le aluga o le tatou atunuu. Ia e lagolagoina le faamoemoe o le miliona lea foi ua tapisa ai ia nao na matou faapena atu a o mea matautia ia ua ou vaai ai i le matou itumalo ua maopopo ai le itumalo, maopopo ai le itumalo fai mea fiafia ua fesootai ai ao le mea foi ua tuu atu le filifiliga o si matou komiti i Nuu filifili mai e outou ua omai nei la tagata ia na filifili e Nuu e fai atu ai mea e fai e amanaia e Nuu. Leaga o latou e ona le tofa na aumai ai tagata lea la ua ou fai atu ai ua maopopo ai fai mea fiafia ua atili ai ua maua ma nai faamanuiaga e pei ona avatu ile faaogaina o seleni o le tatou komiti o le mea foi se tatou o e fai faatoa tatou iloa pea tatou o e fai.

O le mea lava lea o le \$800,000 lea na fai mai i le tausaga na tea nei e le i atoa mai ia le miliona, e pei ona fai atu e tasi lava le mea e faataga ai le faaogaina o tupe o le Tala o le Tupe. E na o le \$200,000 lava le mea na faataga mai i le Tala o le Tupe, pau na. O le tagata la e aogaina lelei, e na te iloa e leai la se \$800 ou te le iloa pe o fea e faavae ai le mea lena. E na o le \$200 lava lea ua uma ona aumai. O lea e faatali le miliona.

Lau afioga i le Minisita ia, sagai ane, o lea e matou te tulituli atu lava ma solisoli muliaao i le mea ua faataatia, ia ae ou te talitonu lava, a loto faatasi ma o e fai, e fai fai lava lelei. O le upu lava na a nai toeaiina.

Ia tau o le soifuaga lau afioga, e pei ona saunoa nisi ua 11%, ia tatou vaai i mea ia e faaagai i ai le lagolago a le Malo. E moi lava o le suiga o le tau, a o mea ia lea e mafua ai le oso i luga o le tau o le soifuaga. E tataua ona i ai ia se tatou Energy Policy lelei aua e leai lava se isi mea o lea e alu ai i luga le tau o le soifuaga, ua sii i luga le tau o le suauu ma mea uma nei e faataamilo ai mea a le lalolagi.

A ua ala foi ona sii leaga o lea ua faasasa e isi atunuu, e o i mea nei o Renewable Energy fai mai e a? e aoga mo le fesuaiga o le tau. Ae se i tau vaavaai, leaga e aafia ai lava ia tatou, e aafia ai lava tatou. E aafia foi i le suiga o le tau, ae aafia foi i le tau o le soifuaga lea e tatou te ola ai i aso fai pea.

Ia talanoa i tatou laisene lau afioga i le Minisita, ia faamalulu atu foi i le taimi ua sola ae afai ua e taofia ia le laisene i le taimi e tataua ona totogi ai, ia e pau lava le mea e ese le manaia o le mea o le taofi se i toe uu tasi lau tupe. Ae a faapea la e uma le tausaga nei o lau meaalofa lea o le a faapafala le laisene mo lena tausaga i nai faipisinisi, e to lou pulou i lau afioga i le Minisita. Ia ae tuutuu atu lava i ina e fai lava e lau afioga le faasoa.

Lau afioga, e pau lava lea o si mea e ese lou... o tatou Visa ia e apply online, faaoga le Visa Card e fai ai lau tusi talosaga, ou te lagona o le isi agai i luma, ailoga e toe feoi o tatou tagata. E tele mea o le leai o mea ia o Visa Card, leai se computer e fai ai online le mea, o lona uiga o le a toe taaalo foi ia agents nei i le faiga o le mea. Ae o le 60% o tusi talosaga ia e ave, e decline mai. E \$300 lau tupe e alu i le apply ina o lau Visa, ae o le tele lava o Visa a le decline, e tasi lava lau entry i Niu Sila uma. E toe sau foi toe fia alu toe fai le isi... ia se i silasila ifo ia i le tatou Malo. E pei e manaia le.... sa o tatou i ai i mea sa fai iinei i Ofisa iinei, a tau atu o le sui usufono le tamaloa la ona faafaigofie mai. Ae a tau atu i tama la i asiasiga i o o le faipule ae fai mai o ai lena sui usufono, e le iloa e tama la e i o tatou. E pei o nai mea ia se i toe fetuutuunai ia le silasila aua le va i fafo i lau afioga i le Sui Palemia.

Ia e le faaumiumia le matou tala, o la foi e faafofoga mai ia si o matou itumalo, ia e tutusa maua ma le sui usufono o Aiga i le Tai, e le i faia ni ma lauga i le Tala o le Tupe leaga sa i ai foi si faalavelave o si ou uso sa valaau i ai le Atua, ae o la e faafofoga mai ia si ou itumalo i le Paia aua le Afio o Tapaau, tainane le Tumua ia Lufilufi ma Fuaiala. Ia le Afio o Aiga Tua ma le mamalu o Tofi faasolo o le aai o le Tupu, ia tainane foi ia Gafa ma Suafa Molioo ma le Ailaoa. Ia malo le tatalo malo le tapuai.

O lea ua uma ona ou fautuaina ia tatou nuu, tatou o e fai ia Sisigafua aua o lea toetiiti nei uma ia Me e faagata ai le Polokalmelae. A o le mea, e le faapea e fai e tatou, ae fiafia ai fua isi nuu. E leai ua ou fautuaina fai, e fiafia ai lava tatou ma o tatou faailoga ai lenei mea taua ua o tatou i ai i le 60 tausaga.

Faafetai i la outou tatalo i Susuga foi i Faafeagaiga o lo o talafaauto i le itumalo, ia malo i lo outou faitatalo ia ua manuia ai ia faamoemoega o si o tatou atunuu. Ia e i ai foi ia si o matou Aoga Tusi Paia i le Aoga Faafaifeau i Piula, Susuga i le Alii Pule ma le mamalu i le laumua, ia faafetai, manuia outou faiva ma fuafuaga uma o faamoemoega o lenei tausaga.

Lau afioga i le... si au uo lea le Minisita o Galuega, e laiti lava nai auala o si itumalo se i e alofa ifo pe a lava lau faasoa. Ia e na o na tuutuu atu lava i ou autafa, a e finagalo i ai, ia o le a faapena ona oo mai ai lau polo faasoasoa.

Ia manuia lau afioga i le Sui Palemia, tatou talosia le taulia o le fala ma le pulu fulusia i le afioga i le Tamaitai Palemia, ia ae faapea foi afioga i Minisita ua... tatou tau fai tatalo ia faapena ona taulu taulu, toe maua so latou laulelei i le alofa o le Atua. Manuia le Kapeneta, manuia Minisita Lagolago, ia manuia foi ia le Sui Taitai ma le paia o lenei Itu, ia ae o matou ola i Lona agalelei, faafetai mo lou avanoa.

FOFOGA FETALAI: Ia malo saunoa i lau afioga i le sui usufono mamalu o Anoamaa 1, ia aemaise foi o lou tulaga faaleaganuu o oe o le

Tumua Lufilufi, ia malo, malo le tofa, malo foi le fetalai faatama o le atunuu. Ia aemaise lava o le toamalie ma le filemu o le tatou Maota ma le atunuu, ia malo faafetai, faasoa foi mo le Nofoa, aemaise foi o le tausiga o le Maota ma le tatou atunuu..... aemaise foi o le Malo i le taumafaiga o poloketi ma atinae o nuu, ia malo mo le folasaga malamalama.

E momoli ai le faafetai mo lou sao, ia o lo o totoe le tatou taimi mo se tasi o tatou sui usufono. Ia o lea ua matau atu o lea ua fou mai le sa o Aana Alofi 1. Tulai mai lau afioga i le Minisita Lagolago.

Tofa FESOLAI APULU TUSIUPU TUIGAMALA (Aana Alofi 1): E tulai i le ava ma le faaloalo, i le paia maualuga o le tatou Maota. Ae avea ia lenei taimi e faatalofa atu ai i lau afioga i le Fofoga Fetalai, lau afioga i le Sui Palemia ma le mamalu o le Kapeneta, le paia maualuga i Minisita Lagolago. Faatalofa foi i le Sui Taitai o lena Itu, tupu ma tamalii ma le mamalu o sui usufono. Faatalofa foi i paia maualuga o sui o Matagaluega taitasi ua mafai ona o tatou faatasi i lenei aso.

Ia e le mafai foi ona faagaloina le faatalofa aua le afio o Le Ao Mamalu o le Malo, o le Masiofo, faapea foi le Sui a Fono Sui Tofia ma le faletua, paia maualuga i le afioga i le Faamasino Sili, ma le Peresetene ma le mamalu o le Faamasinoga.

Ia ae tainane foi o fata faitaulaga e fia i totonu o si o tatou atunuu, o lo o nono manu aua Samoa ma lona manuia. Ia avea ia lenei taimi ou te faatalofa ai i lou itumalo o Aana Alofi 1, le Paia i Aiga, ia faapea le mamalu i le Faletolu o Fuaifale. Faatalofa i le aufaigaluega o si o matou nuu, o le matou itumalo, ia malo le onosai.

A o lenei vaega o le taeao ma lenei vaega o le aso, e le umi se lagona ma se manatu ona o le Tala o le Tupe o lo o faataatia nei, Tala Faaopoopo ia aua se lumanai manuia o Samoa mo a taeao. O le agaga maualuga e momoli le agaga faafetai i lau afioga i le Minisita o Tupe ona o le tala ootoo o lenei vaitaimi o totoe o le tausaga. E momoli ai le agaga o le faafetai i lau faasoa ma lau fetuutuunai o mea lelei ia aua lea Matagaluega ma lea Matagaluega ia aua le atinaeina o le tatou Malo. O le mea lea e momoli atu ai le agaga faafetai tele i lau afioga i le Minisita o Tupe.

E momoli foi le agaga faafetai i le Minisita o Galuega, ia o le agaga maualuga e pei o le upu e tu manu ae le tu logologo, ia e faamanatu atu pea ia si ou itumalo ia nai auala o lo o fia faaleleia ia ma nisi o vaega, ia e i ai le manatu maualuga e tatalo pea i lau afioga i le Minisita o Galuega, ia po o le a se taimi ao se aso e faataunuu ai ia fuafuaga, ia e alofagia ia lou itumalo, i auala e fia faaleleia ia ma le agaga faaloalo.

E faafetai foi i lau afioga i le Minisita o Faatoaga, e matau i lenei aso ua tele foi lafoga, i le gau, gau o le vaalele. Ae e i ai le manatu maualuga e tatalo atu ai i lau afioga i le Minisita o Faatoaga, ae a pe a fai se tatou vaalele a le tatou Matagaluega, aua e i ai le manatu maualuga, e feaveai ai

taumafa aua ia Ausetalia ma Niu Sila, ina ia taunuu atu ia fofoga taumafa o le atunuu, ao la e felesi. Ave nei, taumafa taeao e lo tatou atunuu i Ausetalia ma Niu Sila, o le ala lea ou te tatalo atu ma le agaga faaaloalo, lau afioga i le Minisita o Faatoaga, fai se tatou vaalele. A gau vaalele a le aualii ia, fai se tatou vaalele e maua ai le sikuea ma maua ai tupe a le tatou atunuu.

E momoli le agaga faafetai i lau afioga i le Minisita o Falemai, ia malo le onosai. E ui lava ina maua i le taimi ua sola i nisi o sui usufono, ia e fefe e talanoa i lau afioga i le Minisita, ae o au, ou te fiafia e talatalanoa i lau afioga i le Minisita, aua e pau lava lea o le Minisita e paepae i totonu o le tatou Maota fono lenei. O le mea lea e momoli atu le agaga faafetai ia ao le tatalo, o lo o i ai nisi o lou itumalo o lo o manaomia ia wheelchairs ia aua ua faaletonu aao i lau faafofoga, ia e manaomia le talosaga i lau afioga, ia e maua mai ia ni wheelchairs taugofie, ia mo lou itumalo i lau afioga i le Minisita. Ia ae faafetai, ia o lea e matau i luga o le ea ma uaealesi faasalalau, ia le sologa lelei o lau Matagaluega ia aemaise ai foi lau afioga i le Minisita. O le mea lea e momoli atu ai le agaga faafetai tele.

Faafetai atu i lau afioga i le Minisita o Aoga, e i ai le manatu maualuga o lea ua faasolo, o lea foi ua maua i nisi o satellite ma latou o lo o faagaioia ia WiFi lea i totonu o tatou aoga. Ia o lea ua matau i si ou itumalo, ia ou te masalo o lea ua amata ona faaola ia Wifi ia, ia fesoasoani aua foi alo ma fanau o lou itumalo. O le mea lea e momoli atu le agaga faafetai i lau afioga i le Minisita.

Ia e le faagaloina foi ia le Minisita o Faamasinoga lau afioga Matamua, i le agaga maualuga, ia malo le onosai, malo foi le faatoatoa. Malo foi le lavapapale, aua o le maota lea, ia o le toaiga o Tumua ma Pule, aua ia upufai o le tatou atunuu, ia o le mea lea, ia malo lava le onosai. O lea lava ua tino mai ia le faamoemoega, ia aua ia lo tatou Matagaluega, o le mea lea, faafetai tele lava le lototele, faafetai le onosai.

E i ai le manatu maualuga e le tele se tala a lenei itumalo, o le itumalo lenei o lo o taoto lelei faavae o lou nuu, o lou itumalo o Aana 1. E i ai le agaga maualuga o lo o talitali pea aua o fea o i ai le tofa o le Faigamalo, ia aua le miliona ma tulaga faapena, ia o lo o lava onosai peea ia lou itumalo. O le agaga maualuga... o ananafi sa i ai le fonotaga a lou nuu ma tulaga faapena, ia o lo o aumai ia lo latou agaga, momoli mai ia o latou alofaaga i le Faigamalo ia aemaise le afioga i le Tamaitai Palemia. Ia o lagona ia o lou itumalo na aumai, ia o lea ou te faaleo atu ai ma le agaga faaaloalo. O lo o momoli mai foi ia o latou alofaaga i le afioga i le Minisita o Tupe, ia aua le faatautaia, o le autu lea o le tatou atunuu, ia o le vaega tau tupe.

O le mea lea e le tele se tala, e na o le alofa atu i lenei vaega o le aso, i le faatoatoa e lau Susuga i le Fofoga Fetalai. E i ai le manatu maualuga, ia agalelei mai le Atua i lenei aso, maua pea se tofa paia i lau afioga i le Fofoga Fetalai, ia aua le faatautaia o le tatou Maota. Ia agalelei le Atua i le

tatou tina o le atunuu, o lo o siimai, ia agalelei le Atua ia faatasi ma i latou, i Minisita o lo o saili le malosi, ia i ai le agalelei o le Atua.

Ia o se tala lea, manuia le Maota i lenei aso. Soifua ma ia manuia.

FOFOGA FETALAI: Ia malo le saunoa i lau afioga i le sui usufono mamalu mai Aana Alofi 1, po o lau afioga foi i le Minisita Lagolago o Faamasinoga. Ia o lea foi ua faasoa mai e le gata o le itumalo ia ao nisi foi mea taua ia aua le tatou Tala Faaopoopo o le Tupe.

Ia ua i ai le manatu o le Nofoa o lea ua o tatou tulata i le tatou taimi malolo. Ua i ai foi le manatu ia e lelei foi le tapena mai o nisi foi finagalo mo nisi foi sui usufono mamalu i le aso a taeao, ia aua le faaauauina o le tatou galuega.

O le mea lea e momoli atu ai le agaga o le faafetai ma le faamalo i sui usufono mamalu na saunoa i lenei aso. Ia faamalo lava le tapena, faafetai foi i le paia o le tatou Palemene lo outou onosai ia aemaise foi o le logosaia o le taumafai atu o le Fofoga Fetalai i le faatonufoiauina o le tatou galuega. Faamalo lava le usufono i lenei aso. Talosia ia le aso a taeao i le alofa o le Atua e toe faaauau ai ia tatou Taulumaga.

Faafetai Samoa i lau tapuaiga, ua tau manuia le Fono a lau Palemene i lenei aso ona o lau tatalo ma lau tapuaiga. Malo faafetai. Faafetai atu foi i le tapuaiga a Ofisa Sili o Pulega o Matagaluega, Faalapotopotoga Tumaoti o le tatou Malo, malo le onosai mo le lagolagoina o tauaofiaga o le tatou Palemene.

E le galo foi se faafetai i auaunaga uma o lo o galulue pea i le tautuaina o le Palemene i taimi o Taulumaga e aofia ai Matagaluega o Leoleo, Matagaluega o Fesootaiga e ala i le 2AP, Pulega o Tineimu, Faalapotopotoga o le EPC, o le Kamupani a le Kooline, ia faamanuia le Atua i le tautua ma le auaunaga mo le Palemene.

Ae tatou te le i tolopo, ou te talosaga atu i le sui usufono mo le Vaa o Fonoti e saunia se tatalo e faai ai ia le tatou Fono.

Na tolopo Taulumaga a le Fono Aoao Faitulafono i le itula e 1:00 i le afiafi seia aulia le Aso Tofi, 19 o Ianuari 2023 i le itula 9:30 i le taeao.